

LES PLANTES,

POÈME

TRADUIT EN VERS LATINS.

Le Poëme français se vend à Paris , chez
DETERVILLE , Libraire , rue Haute-Feuille ,
N.º 8.

16993/p

LES PLANTES,
POËME,
TRADUIT EN VERS LATINS.

*Le poème français , les PLANTES , se vend
à Paris , chez DETERVILLE , Libraire , rue
Haute-Feuille , N.^o 8.*

1750

BOTANICÓN
LIBROS QUATUOR,
È CARMINE GALLICO
VIRI CLARISSIMI R. R. CASTEL,
In latinos versus transtulit
CLARUS-LUDOVICUS ROHARD,
RHETORICÆ PROFESSOR
In Scholâ Regiâ Militari Flexensi.



A LA FLÈCHE ;
Chez le Suisse de l'Ecole Royale ;
A PARIS ,
Chez AUDIN , libraire , quai des Augustins , n.º 25.

DE L'IMPRIMERIE D'AUGUSTE MAME , A ANGERS .
Décembre 1818.



PRÉFACE.

LE poëme des PLANTES a déjà été traduit dans plusieurs langues, et sa quatrième édition est presque épuisée; c'est, pour un ouvrage en vers, un assez beau succès dans un temps où les romans et les brochures politiques ont presque entièrement étouffé la littérature. Lorsque j'entrepris de traduire en vers latins le poëme de M. CASTEL, je n'avais pas sans doute présent à l'esprit ce conseil de Boileau:

Craignez d'un vain plaisir les trompeuses amores,
Et consultez long-temps votre esprit et vos forces;

je me laissai entraîner par un sentiment passionné pour l'ouvrage, ainsi que pour la personne de l'auteur. J'admirais dans le poëme toutes les beautés que comporte le genre, si heureusement placées, et traitées sans afféterie; et dans l'auteur, un ami de la nature et de la vertu, un littérateur plein de lumières et de goût.

Mes efforts ont été encouragés par d'anciens amis, dont quelques-uns rentrés en France depuis la restauration, m'ont assuré qu'une traduction du poëme des PLANTES, en vers latins, serait favorablement accueillie, même

P R É F A C E.


chez ceux de nos voisins qui en ont déjà des traductions dans leurs idiomes. J'ai reçu de nouveaux encouragemens de la part du premier humaniste de l'Europe , qui , dans son *Hermès Romanus* (1) , a publié tout le premier chant de ma traduction. M. Servan de Sugny , dans son *Annuaire des Muses latines* (2) , m'a fait aussi l'honneur d'insérer plusieurs fragmens des trois autres chants. Puisse donc cette traduction , après tous les soins que j'y ai mis , justifier tant de bienveillance !

(1) L'*Hermès Romanus* , par M. Barbier-Vémars , est publié le premier de chaque mois , par cahier de 48 pages in-12 , à Paris , rue du Cloître - Notre-Dame , N.^o 4. SA MAJESTÉ a ordonné qu'il serait payé annuellement , sur sa cassette , au rédacteur , le prix de cent souscriptions , pour l'unique exemplaire qu'ELLE daigne recevoir.

(2) L'*Annuaire des Muses latines* , à Paris , chez Audin , libraire , quai des Augustins , N.^o 25. La première année a paru au mois d'août 1817 ; la 2e. année au mois d'août 1818.

VIRO CLARISSIMO,
RENATO-RICHARDO CASTEL:

Virtutis potius , vani quam cultor honoris ;
Hoc memoris tibi sit pectoris obsequium.



BOTANICÓN

LIBER PRIMUS.

O qui prata et agros , sylvasque et amoena vireta
Incolitis , varias et amico numine plantas
Mulcetis , Zephyri ; Dryadesque ; urnaque perennem
Uberè fundentes herbis lætantibus undam
Naïades , date vestra sequi vestigia : vestra
Discere ruris amans gestit mysteria Musa.

Tuque ô cui semper , nec vana per otia , magnis
Nec sinè deliciis , studuere sophique ducesque ;
Quæ virides inter frutices , ramosque , vel herbas ,
Tàm varios nitido spargis splendore colores ;
Adsis Flora mihi dea , carminibusque disertos ,
Emunctis placeant qui naribus , injice flores.

Littore ab Hesperio regnas Orientis ad oras ;
Obseris uberibus Maurusia littora donis ;
Errantūm recreas Lapponum lumina ; celsos
Nobilitas montes pretioso gramine ; et imo
In pelago immensis humentia frondibus ornas
Antra , solent quibus æquoreæ considere Nymphæ.

Tu calice in tenui florum suayissima fundis
 Mella apibus ; roseo miscens quæsita sapore
 Pocula , coelestes rorâsti nectare mensas.

Fœtos lætitiâ nobis turgere racemos ,
 Triticeasque jubes nobis pinguescere aristas.

Te sinè , divitiis orba et propagine , inertem
 Nil nisi luxuriam foliorum admitteret arbos.
 Numine terra tuo , lymphæque ornantur , et aër ;
 Omnia te roseum spirante afflantur odorem.

Deliciæ aspectus , ridentis gaudia terræ ,
 Salve ô Diva , mihi nascentia germina amicâ
 Ultrò evolve manu ; vitroque ut in æquore , nostris
 Versibus eniteant rutili , tua munera , flores.

Quum primâ Zephyrorum aurâ putrescere campi
 Elabique nives cœpere , virentia nûmquis
 Gramina inertis ocul' spectet , gemmasque micantes ?
 At si quis reputat plantis nos ducere ab isdem ,
 Quum maturuerint , alimenta et gaudia et omnis
 Lenimen morbi , nolit nescire quid illis
 Sit generis , morumque , et quæ sit denique virtus .
 Quem lateat facile hoc studium quâm debeat esse ,
 Vitæ deliciis atque usibus omnibus aptum ?

Sæpius officiunt inimicæ frugibus herbæ ;
 Ipse tamen valles vere insectatus et æstu
 Agricola , impensæ non ulli operæve pepercit ;
 Optimaque excussâ delegit semina vanno.
 At nescit quæ triticeos invaserit agros
 Infesta herbarum propago ; eademque quotannis ,
 Ipso nequicquam sudante , repullulat herba.

Nec nulla infido pecudes necat herba veneno :
 Bucula , vernanti quum gramine prata virescunt ,
 Nescia odorari sævam sub rore cicutam ,
 Exitio occumbit tristi ; sortemque malignam
 Ignari incusant : facili sed providus arte
 Cayisset pastor nè dira occureret herba.

Si scateant lætis fluviales piscibus oræ ,
 Si tibi viminei casses et subdola retis
 Lina placent , hamusque , et linea pensilis ; isti
 Munere Diva suo nostra auxiliabitur arti.
 Incautos etenim , genus insatiabile , pisces
 Plurima plantarum vis allectabit odorque.

Retibus immisce caules benè olentis anisi ,
 Et mentham halantem , nardique fragrantis aristas :
 Prædarum ingenti rumpentur pondere casses.

E pelago in fluvios redeat quo tempore piscis
Ipsa etiàm certo nos admonet indice Flora.

Nàm prímùm ut surgunt riguis nasturtia pratis,
Tùm simul omne genus salmonum excedere vasto
Æquore, et oppositos obices assultibus altis
Certatim exsuperans, patrios remeare sub amnes.

Felix ille igitur qui prataque, et avia lustrans
Clivorum, dites potuit cognoscere plantas !
Callet enim fidis placeant quæ pascua bobus ;
Undè gravi lentæ redeant vix ubere capræ ;
Et quâ luxurient agni cum matribus herbâ ;
Et quo quadrupedes recreati gramine, cursum
Proripiant, celeresque velint prævertere ventos.

Lanæ compiscuum si quis velit addere honorem,
Vicino in saltu poterit reperire colores.

Tristi si qua lues infecit corpora morbo,
Propitia in viridi florent medicamina valle.

Si verò atra fames regionem afflictat egenam,
Non timet ille suæ nè rara cibaria proli
Deficiant; artis nàm docto lumine ductus,
Quas misero abdiderat vulgo natura, latentes

Novit opes , tacitos sylvestri ex arbore fructus ,
Multaque desertâ reptantia tubera terrâ.

Novit et incultam si quâ cerealibus herbam
Suffecisse queat granis industria ; et alnum
Ex hederâ et pinâs de corice fingere panem .
In gremio florum et foliis certissima cernit
Signa quid auster atrox meditetur , quidve procellæ
Instet , agrone metenda Ceres , credendane sulcis .

Utilia imprimis audi præcepta , virentes
O quicumque levi rastro insectaberis hortos .
At , mihi crede , in agris , in saltibus , atque per ima
Vallium , et aërios , loca desertissima , montes
Libera ubi crescunt , propriâ quæ semina dextrâ
Natura insevit , nobisque interprete nullo
Ipsa suæ gaudet miracula prodere mentis ,
Ipsiœ arcana melius scrutabere leges .

Extremis Asiæ tibi si mittuntur ab oris
Aut alio rari longinquo è littore alumni ;
Istis quale solum , quænam aura , an frigus , an æstus
Conveniat , surgant primi quo sidere flores ,
Discentem indicibus certis documenta monebunt .
Tunc demùm tenuis solerti arbuscula curâ
Admittet simili patriam sub sole repertam .

Numquām nē veteres tamen anteferamus amicos :
 His nempè antè alias fœcundis stirpibus omnem
 Curam adhibere decet , nostris quæ saltibus ortæ ,
 Nostras circùm urbes , nostro subsistere cœlo
 Consuetæ , nostros aptissima munera ad usus
 Spontè ferunt ; arctis neque contrà frigora cellis
 Clauduntur , vario sed amœnānt rura colore .

Quarum palmitibus , si quos invisere rupis
 Anfractus mihi mens , adnixus inhæreo ; eadem
 Floribus antè pedes lato spatiantis in agro
 Internuntque viam , recreant et lumina visu ;
 Certatimque mihi ditissima dona quotannis
 Fundentes , dulci curvantur pondere rami .
 Hinc dapibus mensas oneramus , opemque dolori
 Accipimus , miserisque optata levamina morbis .

Nunc sua dimensis decet ornamenta viretis
 Addere ; at ipsa manus nostras regat usquè venustas .
 Artes hortorum geminæ dominantur in orbe ,
 Diversisque locos ornant rationibus : una
 Nata inter Gallos , observans ordinis , omnes
 Secum artes ducens , festivâ splendida pompâ
 Incedit , rutilâ frontem redimita coronâ ,
 Et variis zonam sertiis ornata inicantem .

Hic tiliæ dociles, paribus per multa viarum
 Dispositæ numeris, lætam viridantibus umbrani
 Dant spatiis, agitat pubes ubi lecta choreas.
 Illæc, ingentes imitatæ fornicis arcus,
 Castaneæ attollunt longo ordine ad astra cacumen.
 Hinc illinc Pario spirant è marmore, doctis
 Quæ scriptis veteres commendant numina Graii,
 Quique suam egregiis patriam, dum vita manebat,
 Artibus heroes illustravere, vel armis.
 Ducta per occultos compressaque lympha canales
 Sublimi exsuperat regalia culmina jactu;
 Atque recumbentes solido inclinantibus urnis
 Ex ære has fluvios effundere dixeris undas.

Ordinis impatiens, hortorum ars altera, comptas
 Despiciens artes, pompamque exosa superbam,
 Ingéniique vias errando imitata, jugum omne
 Abjicit. Hanc celebris dudum colit insula, nostro
 Spumosi quam sæva fræti unda removit ab orbe,
 Sævior at removet decepti insania vulgi.
 Illos non rectis hortos metatur arator
 Callibus, ast errans sinuoso tramite virgo.
 Diversis hinc indè locis, conjuncta gregatim,
 Arbore densa arbor, sponte hic et nata videtur

Et sorbita suam stationem ; nullaque falcis
 Vulnera passa, procùl, quantùm vult, projicit umbram.

Per collem niveo carentes vellere pascunt
 Gramen oves , et luxuriant cum matribus agni ;
 Custoditque gregem , summo de vertice collis ,
 Pan ortas inter Boreali è littore pinus.

Explicat illecebras h̄ic rustica villa modestas ,
 Munditie insigni ; butyrum , lac molle , serumq̄ue
 Pingue levi pressum calatho , venientibus offert.
 In testudineum sarmenta sequacia dorsum
 Illīc pampineo densissima vitis honore
 Porrigit , è vivo servat quam marmore Bacchus .
 Unda modò occultis rauco cum murmure currit
 Tramitibus , lato nunc limpida lucet in alveo ,
 Et vitreos flavā latices extendit arenā ,
 Virgineum invitans secura ad balnea cōtum ;
 Et caput infesto cornu deformis , in orā
 Admonet Actæon : « Procul , ô procul este , profani ! »

Regales ità diversis rationibus horti
 Ornantur ; sed frugiferum tu , more Catonis ,
 Hortulum ama , qui læta tibi det oluscula , et omne
 Pomorum genus , impensas et fœnore vincat.

Vere labor primo incipiat ; jàm semina terræ
 Crede ; nihil vario sinè semine ridet in hortis.
 Ergò priùs terram exerce , validisque lacertis
 Alta , pede innitens , capulo tenùs ingere rastra.

Sicubi vernantes geminatâ voce per agros
 Insonuit volucris vesano invisa marito ,
 Si tres propitius noctes non desinit imber ,
 Udà post triduum surgunt sata semina terrâ.

Areolam sævis aversam Aquilonibus unam
 Elige , sol mediâ foveat quam luce benignus :
 Floribus hæc teneris dabit incunabula , rarâ
 Sub tellure simi tepidos complexa vapores.
 Hic hieme in mediâ , fausto decepta calore
 Semina turgescunt ; radiisque excitus amicis
 Cauliculus micat , et florum primordia trudit.

His verò invigila : noctem vix luce cadente
 Inducit vesper , lethali à frigore vitrum
 Per dubios menses et densæ protegat alta
 Congeries paleæ ; noctu nam sæpè tenellas
 Bruma repentino necat acris vulnere plantas.
 Immani stridet Boreas asperrimus irâ ,
 Et « multa in tectis crepitans salit horrida grando . »

Infensam è Scythicis hièmem erupisse cavernis
Dixeris, et niyibus glacieque redire rigentem.

Frigore tūm trepidat Procne, jejunaque circūm
Tecta volans, muscas rostro venatur hianti
Frustrà; et in angululis clauduntur frigore muscæ.
Illa ægrè tremulâ vacuas démissa per auras
Pennâ, jàmque cadens, zephyros incusat iniquos
Qui, miseram infido revocantes flamine, sæva
Incautam insidiis pepulère ad funera blandis.
Sic, nisi provideas, primo jàm in limine vitæ
Decidui heu! Stygias flores rapiantur in oras.

At flores dūm propitio sol fervidus æstu,
Et vivis tepidi recreant humoribus imbræ,
Intereà et crescunt inimicæ floribus herbæ,
Hosque bonâ fraudant almæ pinguedine terræ.

Sors ità constituit: tristes inamabilis umbras
Invidia ingenio solet induxisse, novisque
Miscetur semper curis heu! fluxa voluptas.
Sic invisa tui cunctis in partibus horti
Progenies, et aculeolis ustiva molestis
Urtica, et viridis glaciali AEthusa veneno,
Herbaque Mercurii de nomine dicta, canique

Dilectum at Floræ nunquam lætabile gramen ,
 Pullulat , et teneros umbrâ suffocat alumnos ;
 Et quantum avellet longis tua dextra diebus ,
 Tantùm , si noctis roraverit hora , resurget.

Ista sed infausto crescentia gramina fœtu ,
 Possumus haud ullos quæ jàm convertere in usus ,
 Tradere nè pigate Vulcano. Occultus acervum
 Arentem crepitans primùm depascitur ignis ;
 Tùm densus tenues elabi fumus in auras :
 Gramina mox , flammâ sursùm erumpente , perusta
 Concidere : at cineres effœtæ pabula terræ
 Læta dabunt , priscumque instauratura vigorem.

Sunt hortis suæ opes , sunt ornamenta ; vicissim
 Tempore quæque suo fidum fert planta tributum .
 Jàm florum in calicem , blando cum murmure læta
 Sese apis insinuat ; nunc hos , nunc mobilis illos
 Papilio auratis libat nitidissimus alis.
 Verùm prò lerido genere , innocuisque vireti
 Hospitibus , turpes irrumpunt undique turmæ
 Prædonum , campe , et scarabæi , et edacia , vermes ,
 Agmina , plantarum partes populantia cunctas ,
 Radicem et folia , et caulem , lignumque librumque .

Vix tenera è sævo recreata arbuscula morsu ;
 Intima vivaci reparavit vulnera fibrâ ,
 Ecce cicatricem infestant , et viscera rursùs
 Erodunt avidis immundi dentibus hostes.

Non aliter Tityi redivivos morsibus artus .
 Immanis rostro discerpit vultur obuncō ;
 Carnificisque sitis , nullo satiabilis haustu ,
 Usquè renascenti babit usquè in corde cruentum ;
 Rimaturque vorax epulis , erratque sub alto
 Pectore ; nulla quies jecori datur immortali.

Quid juvat insidias narrare , dolosque , levesque
 Reticulorum artes , quibus insectére minorum
 Agmina monstrorum ? Nobis nàmque ista volucres
 Arcebunt : Frigilla procax ; et Loxia rubro
 Pectore ; subviridisque nitenti Loxia plumâ ;
 Et nigram insignis frontem Parus , atque modestum
 Dulcisono exornans cantu Philomela colorem.
 Omnes assiduo círcùm dumeta volatu
 Venantur , nidisque ferunt lætantibus escam.

Sin antiqua tuis etiàm nunc exstat in agris
 Arx , alto círcùm quæ vertice desuper arva
 Prospiciat ; magnum talpis et agrestibus indè

Muribus exitium. Noctes vigil indè diesque
 Alituum genus, et corvi crepitantibus alis
 Præcipites, opicis expurgant furibus hortos.

Ergò tibi alituum placeat genus omne; sinè illis
 Nec tām graminei gelidis in vallibus amnes,
 Nec tām mobilibus viridantia messibus arva,
 Nec tām speluncæ placeant, nemorumque latebræ.
 Alitnum ludis et cantibus omnia rident;
 Illi hortos ornant; si quem formosa virentes
 Nidum inter ramos arbuscula sustinet, olli
 Delicias dominorum omnes hærere fatentur.

Aucupis infandas odi immiserabilis artes
 Qui teneram matri sobolem dextrâ asper avarâ
 Eripit. Ah! potiùs nostris adolescere in umbris,
 Ruraque concentu liceat recreare canoro!
 Nec vel inaurato captivos carcere claude;
 Semper enim desiderio sit et aeris ora
 Liberior, patrumque nemus, dumetaque nota,
 Dulce sònare melos ubi, et arridere voluptas.

Argutâ volucrum voce exstimulante, cùbili
 Illicò surgit amans plantarum, urbemque relinquit,
 Et matutinum rorem inter et humida ruris

Gramina, magnificas immenso lustrat in horto
 Mirabundus opes. Quantum ex oriente colorum
 Se sole effundit, se quantum effundit odorum !
 Qualis humi sese circum undique pandit imago !
 Collibus in mediis micat auro primula veris ;
 Pingit se rivo ac clinis narcissus ad undam ;
 Cespite et in viridi, quo sese abscondere gaudet,
 Prodit odor violam suavissimus. Ille profundas
 Sylvarum latebras subit indefessus, et alta
 Saxorum audaci concendit culmina gressu ,
 Quas oculos vulgi celat natura, salubres
 Vestigans plantas ; pretioso donec onustus
 Fasce, domum laeto festinans corde revertit.

Sæpius hunc agili sequitur pede multa bonorum
 Turba adolescentum, doctrinæ fervida amore.
 Ardua clivorum scandunt, crebrosque vicissim
 Scrutantur dumos studioso lumine. Si quis
 Protulit ignotam quærentibus angulus herbam ,
 Ilicet assertur docto monstranda magistro.
 Hic plantæ nomen, turbâ admirante, repertæ
 Edocet, atque habitus, et quo det sidere flores ,
 Et quibus illa locis soleat sibi condere sedem.

Halic, vos, ô pueri, studio indulgete ; benignâ

Flora manu vobis sua munera euntibus offert ;
 Fas opibus naturæ uti ; sed , credite , abuti
 Nè libeat , neque sylvestres offendere Divos.
 His etiam virgulta placent inculta ; remotis
 Sæpè locis Nymphas et , agrestia numina , Faunos
 Sylvanosque ferunt , lunâ illucente , choreas
 Exercere , novis redimitos tempora sertis.
 Hi læta arcanis nemora et deserta locorum
 Exornant studiis ; horum clamore jocantum
 Sylvæ et saxa sonant , nostræque per ardua vocis
 Antra repercussæ geminata resultat imago.

Ipse quoque , à teneris , naturæ accensus amore ,
 Sylvarum quærebam umbras placidosque recessus.
 Non mihi Versalicas mos sæpè invisere pompas ,
 Verùm Senartì nemora inter opaca silentis
 Totâ errare die , calidoque Abrontis in agro ;
 Et mihi ridebant , præter loca cætera , Fontis
 Bellaquei merito quam dicunt nomine sylvam ,
 Illaque ubi Oësⁱⁱ sese adjicit Auxona lymphis.

O mihi quanta tuo spatianti in rure , Modunum ,
 Gaudia , florigeris quum sese in collibus Ophrys
 Obtulit illa , levi similis volitantiibus alâ !

Florem credideris volucrem , jām caule relicto
 Velle per aërios celeri fugere impete tractus.

Si quis ab extremis talem alta per æquora plantam
 Finibus attulerit , quantum omnes ista tuendo
 Suspensos teneat ! nostri sed plurima frustrà
 Admiranda ferunt , et neglectissima , saltus :
 Hos pedibus calcat venantum turba profanis ,
 Latratuque canum turbat sonituque tubarum ,
 Et lignatorum populatur acerba bipennis.

Mecum ô blanda veni , dilecti ruris , Elisa ,
 Deliciæ , placidæ donis ornata Minervæ ,
 Casta veni conjux ; roseâ jām candida Eoum
 Luce Aurora polum spargit , nitidusque rubenti
 Sidere mox Phœbus totum illustrabit Olympum .
 Nunc licet ambobus rorantes ire per agros ,
 Incertas Zephyrus plantas ubi flamine molli
 Demulcens , auris tām suaves miscet odores
 Quām pia vota tuo quæ corde ad Numina surgunt.

Hic ubi florentum cudent capita alta pirorum ,
 Obscurum cernis clivoso in tramite tectum ?
 Hic bonus hesterno tardatus vulnere reptat

Agricola, errantem qui, quum dumeta per alta
 Capreolum insequitur, se saxo illisit acuto.
 Cui si quid valeat sœvum lenire dolorem
 Quæramus. Tua, jàm dicto obsequiosa parentis,
 Filiola in manibus teneris, pia dona, salubres
 Saniculæ flores, Centaurique attulit herbam.

Hæc adhibere ægro properemus : amica dolenti
 Auxilia et placidæ dare nos solatia frontis
 Quàm juvat ! O si me solum unquàm tristis, ut illum,
 Fortè dolor cruciet, quàm te mihi, Elisa, videre
 Dulce sit et gratum ! miseris succurrere quantas
 Delicias ferat, ignavo non pectore sentit
 Quem turpi mollis constringit inertia vinclo.
 Nullius iste malis ullâ valet arte mederi :
 Sed miseros inter jacet ipse miserrimus ; ægra
 Usquè fatigato patitur fastidia corde.

Nequicquàm rident redivivis floribus agri,
 Ditibus alma Ceres frustrà flavescit aristis,
 Pampineos et ovat per colles turba Lyæi,
 Hibernisque riget natura severior umbris ;
 Vix unquàm iste oculo naturam spectat inertî
 Infelix ! Diro velutì nascentia ferro

Lumina crudelis rupisset dextra , silentis
 Obscuro tempus vitæ trahit omne veterno.

Nunc veris geminantur opes crescentis ; adultam
 Naturæ nunc vis acuit divina juventam.
 Omnia nunc fervent ; viridanii tegmine quercus
 Projiciunt campis seram lætantibus umbram.
 Liquitur in rores aër fœcundus , et imâ
 Sub tellure omnes tractus subit utilis humor.
 Exundant liquido nitidissima germina succo ;
 Vallibus et sylvis miri effunduntur odores ;
 Optato allecti recreantur frigore sensus ;
 Et jàm cuncta novâ gaudent animantia vitâ.

Sollicitâ volucres operosa cubilia curâ
 AEdificant ; ab equo si quis pilus , inter acutos
 Si qua rubos cadit ex ovibus tenuissima lana ,
 Hæc ipsæ ore ferunt , miram intexenda per artem.
 Nàm quis blanditias , ludosque , et facta sugarum ,
 Ardentesque animos , dulcesque enarret amores ?
 Nonnè vides , Veneris quàm fervidus æstuet igni
 Passer , et assiduo sociam circùm impete sese
 Exagitet ? Nec ei , simùl atque potitus amorum est ,
 Friget amor ; sed deliciis velut usquè renascens
 Ingeminatur , amorque ex ipso crescit amore.

Ecce tuis, Puer Idaliæ, nova serta coronis
 Adduntur; tibi et iu plantas quoque parta potestas.
 Suspiciosi animi si curam exemeris ægram,
 Cætera, qui nobis, amor est et floribus idem.

O quia lœta Papho das jura, Cnidoque, Cytherisque,
 Inò per immensum regnas validissimus orbem,
 Adsis, ô formose Deus, tua dona canenti.

Candida purpureis surgunt tentoria velis;
 Hic thalamos parat alnia Venus lœtosque hymenæos.
 Solo agitata priùs Zephyrorum flamine; motus
 Nunc alios planta edidicit, manifestaque blandi
 Signa dat ardoris: nova per commercia multos
 Inter se videas nutare, dare oscula flores,
 Inque vicem arridere, pari et se innectere amore.
 Si se fortè dies obscurat, opacaque cœlum
 Obducit nubes, subito commota pavore
 Marcescunt folia, et rami, radiique, calixque;
 Clausa procellosis tentoria cladibus obstant,
 Dulce et conjugium placidas differtur in horas.

Stat generi mos cuique suus. Sæpissimè in uno
 Fœmina masque toro socialia fœdera servant;

Depositis alii thalamis , ut cuncta salicta ,
Diversum ostendunt diverso in stipite sexum .

Solis ubi redditus radianti vellere signans
Luxuriantem Aries cum vere reducit amorem ;
Plurima tūm vacuum trans æthera semina mittit
Conjugis in gremium viridantis masculus ; et si
Lata palus interjaceat , tamen intima nectunt
Vincula conjuncti Zephyris famulantibus ambo .

Spumantis Rhodani sub rauca sonantibus undis ,
Per menses bis quinque , genus mirabile plantæ
Immersum latet ; at Veneris redeunte solutus
Tempore consurgit caulis , lucenique revisit .
Immoti antè mares velut imo in carcere , ruptis
Tūm vinclis , ad heram denso omnes agmine nare .
Festivos inter festiva per æquora cœtus
Solenni dicas Hymenæum incedere pompâ .
Tempora sed Veneris postquam effluxere , recedit
Planta reducta sinus , iterumque immensa profunda
Incubat , et felix adolescit flumine semen .

Haud procùl extremi glacialibus axis ab oris ,
Immatura breves horrendo deprimit æstus

Bruma gelu, informes nec dat pubescere fruges.
Morum non constans illuc natura suorum
Educit rupto viventem stigmate plantam,
Quæ modò terræ hærens, properoque excreta vigore,
Par ipsi assurgit non longo tempore matri.

Nobis ipsa quidem pactorum conscientia amorum
Præbet propitias nox opportuna tenebras;
At manifesta suo florum connubia Phœbus
Lumine collustrat. Simùl ad cendentia cœli
Ostia constantes oculis vigilantibus Horæ
Solis equos junxerè, novâque cacumina luce
Fulserunt adversa; Tribus pleraque micantes
Plantarum Auroram festivâ in veste salutant,
Dulciaque exercent connubia, cuncta volucrum
Agmina dum lætis permulcent cantibus auras.

Tùm Veneri indulgent aliæ quum fervida summos
Rore exhalato terra undique colligit æstus.
Vespere sed nitidam veniente obnubere frontem
Horâ quæque suâ, et solitos admittere somnos.
Externo flores oriundi è littore pauci
Declinare solent nostris à lumine in hortis,

Nobiliumque instar dominarum (regia quondam
 Plebeios mores quas temnere suaserat aula)
 Nocturnas vigilare vices , dormire diurnas.
 Scilicet adversis procùl in regionibus , undè
 Ad nostras olim extractos adveximus oras ,
 Lux oritur , nostro quum sol decedit ab axe ;
 Moribus et patriis nostro quoque fidus in orbe
 Semper eadem horà flos et mense hiscit eodem.
 Non aliter miseros fractâ rate , si qua recepit
 Terra ignota ; ægrè collectis tristibus illi
 Reliquiis , patrios alieno in littore servant ,
 Longinqui exsilia solamina dulcia , mores.

Sed nova jàm videas miracula . Mutua aventes
 Per tenuem exercent volucrem commercia flores .
 Conjuge si vir abest , fato si neuter iniquo
 Intervalla nequit superare ; ad utrumque vicissim
 Ecce apis optatum vehit officiosa tributum .

Hoc illis nos auxilium dare possumus ipsi :
 Ardentî in Lybiâ , raros ubi vertice prono
 Plurima adulta mares arcessere Palma videtur ,
 Unius ayulsos florenti è stipite thyrso

Providus in Palinas dextrà quatit Afer amicā ;
Et tali natos hymenæo carpere fœtus
Exsultat sator , autumno loca nota revisens.

At me læta diù tenuerunt gaudia amorum ,
Debeor et reliquis quoque tempestatibus anni.

EXPLICIT BOTANICON LIBER PRIMUS.

BOTANICÓN^A

LIBER SECUNDUS.

TERRARUM immensum fecundis ignibus orbem
Qui fovet irradians, Geminorum lucida Phœbus
Sidera transgressus, summi petit ardua cœli.
Huic tempestates, variis in vestibus, altis
Nubibus invectæ, currum comitantur; et illo
Dante, vicissim orbi vernantia grama, flores,
Arvorum et fœtus; et vitea pocula fundunt,
Utilia et gravibus concussa tonitrua nimbis,
Unde fit uberior tellus et purior aër.

Nunc vultu AEstatem compellans ipse sereno,
Eia age, Natarum, dixit, primæva mearum,
Fas mecum tibi flammigero considere curru;
Pars tibi magna meæ sit vis, sit pars et honorum;
Surgentem exultans cœlo te sentiat orbis;
Jàm verò immanes, ô Nata, resolve pruinias
Montibus in summis, radios ubi tristis inanes
Spernit hyems; et hyperboreum devolve per æquor
Cæruleas denso concretas frigore moles;

Pulsus et à Scythicis australes fluctus ad oras,
 Emanasse tuo mare et intumuisse calore
 Inclamet; sua crescere aquis animantia et auris;
 Nata, jube; culicum scateant hinc indè paludes
 Agminibus, strepitent que examina mille per herbas,
 Et sua quemque adeò teneant animalcula florem.
 Te quoque dante, altà sub terrà effulgeat aurum;
 Iguivomusque tuâ splendescat luce pyropus.
 Dona etiàm potiora ægris mortalibus adde:
 Infima quas virides cernis fluitare per arva,
 AEstu propitio da maturescere aristas;
 Quæque inopis miserata Ceres tutamina vitæ
 Excolere edocuit, tu da flavescere farra.

Sic ait. Illa sui præcepta facessere patris
 Nobilibus properat fatis lætata; per auras
 Et per humum, fluvii in morem, diffunditur æstus.
 Qui certè haud nocuus, sed priscis commodus arvis
 Spontè ubi nùnc etiàm Natura operatur, ubi ingens
 Gramen, et alta filix, et opaco tegmine muscus
 Almæ defendunt telluris summa, nec ullos
 Transmittunt radios, nisi ut æstuet utilis humor;
 At per aperta locorum ubi cultu industria victrix
 Vertumno solet et Pomonæ imponere leges,

Non mora longa , illo tellus exusta calore
 Florum infelicem marcentūm amittit honorem ,
 Exantlare novos semper nisi sedulus imbræ ,
 Quotidiana avidis infundas pocula plantis.

Vos igitur placido lætos quæ numine fontes
 Ducitis et rivos , nobis felicia aquarum ,
 Naïades , urnis effundite munera plenis.

Felix cui madidæ sinuoso è fornicè rupis ,
 Usque susurranti scaturit fons limpidus undâ !
 Fluminibus pompa est major , sed sæpè viretum
 Testatur quanto vicinia tanta periclo.

Ne riguos terræ latices infunde , perustum
 Quum summo indurat sol ardentissimus astro ;
 Tuncenim inanis abit , nechumum ipsa refrigerat unda ;
 Imò sitim irritat fragrantem , altasque volucris
 Ut vapor , ut fumus levis , evanescit in auras.
 Non aliter festis quum thura sabæa diebus
 Ante aras ignem tetigere , repente coruscam
 Ad cameram sese fragrantia nubila tollunt.

Quum rapidi eoâ , prænuntia solis , ab orâ
 Consurgens , aperit roseos Aurora colores ;

Seù magis , Hesperium Veneris quùm sidus amicas
 Post strepitus umbras atque otia læta reducit ;
 Tùm demùm tellus , diurno exempta calore ,
 Blanda salutaris deposita munera lymphæ.
 Tùnc etiàm , quùm sera dies deferbuit ; æstu
 Fessæ , deformes , et prono vertice , plantæ
 Languent ; sed riguos ubi potavere liquores ,
 Redditur effectis nova vita , iterùm que virentes
 Attollunt redeunte caput sublime vigore.

Omnia jàm lymphis recreata . Bibere vicissim
 Et longo traxere haustu data pocula plantæ.
 Occiduus dùm sol etiam nùnc luce cadentes
 Extremâ tenebras inspergit , rursùs amicis .
 Tempus hero varias oculis invisere alumnas .
 Tùnc etenim suaves iterùm exhalantur odores ,
 Tùnc buxos inter virides coma gemmea florum
 Effulget , felix et ubique arridet imago .

Cras et ocellorum , cras et rubicunda rosarum
 Germina certa dabunt venientis signa decoris ;
 Arbor et Armeniæ , Cerasuntis et arbor opimos
 Certatim hesterno tribuent pro munere fructus ;
 Atque tui , totis æstatis mensibus , horti

Perpetuo lætos effundent ubere fœtus ;
 Terrarum similes summo sole usque calentum ,
 Dives inexhaustis ubi semper et ubere et æstu
 Gleba voluptates immenso parturit orbi.

Illic , in campis nigricantibus , atque per alta
 Sylvarum , Flora exsurgit procerior ; oras
 Arboribus tegit immensis Natura , caduci
 Damnum ævi quæ despiciunt tumidasque procellas .

Ingenti similis , densissima Seiba , turri ,
 Circuitu vasto centum quæ jugera inumbrat ,
 Latâ super sylvas attollit brachia , et ipso
 Suspensam extendit sublimis in aëre sylvam .
 Tota novis quotiès Terra est habitata colonis ,
 Splendida quot miserâ ceciderunt regna ruinâ ,
 Ex quo monstrum ingens , humiles natum inter ericas ,
 Ardua longævum caput inter sidera librat !

Illic perpetuo splendentes munere Phœbi ,
 Nobilibus plantæ excellunt virtutibus : omnes
 Delicias superans Arabum faba , divite succo
 Excitat ingenium , permesside laor undâ .

Parte aliâ , rubro sese arbos cortice vestit ,

Qui mihi si trépidis febris furit horrida membris,
Præsenti expellit miserum medicamine morbum.

Ad virgulta alibi siliquas appendit odoras
Subrepens, blandos vanilla datura sapores.
Saltibus ipsa suis Amboïna læta superbit;
Nostraque Bandæis nucibus conyivia fervent.

Conspicuâ insignis formâ florumque nitore,
Virginei sensus imitatur planta pudoris:
Quam si fors digitus tetigit levis, illa repente
Tota tremit, caput et replicatis frondibus abdit,
Et ramos in se retrahit curvata dolentes.

Miramur tenues queis circùm tecta vorandas
Exilis muscas venatur aranea, casses;
Ipsa Dioneæ jàm cedit aranea plantæ:
Hujus enim in mediâ folia insidiosa palude
Nectareo sævos abdunt sub melle dolones;
Quin etiàm occulto malefida armatur elastro,
Quod simul ac tetigit jejuna proboscide musca,
Muscipula obstruitur; confossaque utrinque, fremensque
Occidit infelix geminato vulnere præda.

Sævo avertamus mœrentia lumina flore.
 Candida nyctantum capita effulsere; rubentem
 Aureus illustrat rutilans Amaryllida pulvis;
 Grandibus encarpis sese induit AEschinomene;
 Vincaeque protrudit roseas viridissima gemmas.

Densa opportunæ Tamarini lætus in umbrâ,
 Immenso amplector prospectu opulenta locorum,
 Spinosis ubi Cactus alit non sponte lacertis
 Ostrea, purpureos non sponte datura colores;
 Pendet ubi fluitans Viburnum in rupibus altis;
 Maturis ubi jàm pomis se Punica malus
 Vestit; ubi.... Non cuncta queo discernere visu.

O flôres tám læti, ô tám felicia poma,
 Quot populorum animo stragem revocatis acerbam;
 Innocuo quotiès, ô fata immania! avarus
 Tám dulces ripas foedavit sanguine miles!
 O mihi si qua procùl nostris incognita nautis
 Insula se reseret, vallem ostendatque beatam
 Quò nunquam impietas Europæ invaserit! Ecce
 Audior; ecce nemus circùm sublime vaganti
 Fragrantem ambrosiis protendit odoribus umbram.

Uno è fonte duo , velut unà è matre gemelli ,
 Desiliunt vitrei prata intèr florida rivi ;
 Sub Myrthis Frigilla melos Amadiva canorum
 Fundit , et excelsæ sub Chamaeropis opacâ
 Fronde micat rutili volucrum genus omne coloris ;
 Grande , Macaotes , pennis radiantibus agmen ,
 Splendida ceù nubes , Auris nemora alta relicta
 Implevit ; pars ore Cocos explorat adunco
 Si maturuerint ; summis pars altera in herbis
 Formosas est Bromelias , formosior ipsa .

Illic innumeri , Florum inter millia , nidi ,
 Auræ vitalis fervore foventur amico ;
 Undique commoti secùs hospita littora ponti
 Lento ægrè adrepit testudo plurima gressu .

Dilectæ Thetidi volucres , ubi Vesper olympos
 Emicat , Oceani deserta immensa relinquunt ,
 Summaque demissâ libantes littora pennâ ,
 Arboreos repetunt magno clamore recessus .

His tamèn ipsa locis densâ caligine nunquam
 Nox lucem obscurat ; simul ac enim ab æthere in undas

Sol caput abscondit , radianti plurima flammâ
Undique planta ardet , mediisque elucet in umbris.

Tûnc Malorum inter nemus aurea poma ferentûm ,
Luciferos agitant culicum mille agmina gyros ,
Et rapida excussis jaculantur fulgura pennis ,
Scintillasque procùl vibrat folium omne coruscas .
Ludo intermisso , redeunt cum nocte tenebræ ;
Lascivoque iterum volitante examine , lætas
Concipiunt iterum nemora irradientia flamas .

Sed neque nativo splendentes lumine noctes ,
Nec dites Asiæ campi , Peruæve fodinæ ,
Laude tibi certent , ô Gallia fertilis . Ipsam
Ægyptum tu vincis , ubi tam læta quotannis
Triplex arva seges Nilo irrorante coronat .

Ipsa etiàm regum domitrix , urbs martia nunquàm
Marte tuo æquavit partas , ô Gallia , lauros .
Nunquàm sequanicas dùm vere puella per oras
Pascit oves , crocodili atras exhorruit artes ;
Nec nemora imprudens tua dùm venator oberrat ,
Immanem aspexit trepidusque expalluit anguem ,
Qui trabis immensæ similis latet inter ericas ,

Atque avido assurgens reserat cava guttura rictu.
 Luxuriat pecus omne tuis in vallibus, uva
 Exquisita tuos per colles pendet, apricis
 Aureus in Rhodani ripis fluit humor olivi,
 Grandia flava Ceres tibi frugibus horrea rumpit,
 Jungit equos generosa tuos ad prælia Mavors;
 Et procul alta tuis maria intremuere carinis.

Nobilium quām multa geris monumenta virorum!
 Meldæus magno assurgens tonat ore sacerdos,
 Immensum è tenebris Carthesius expedit orbem,
 Ingenium eximias nostrum excoluere per artes
 Racinius, Pascal, Cornelius, ac Bolæus,
 Burdigalus legum reserans oracula Præses,
 Cunctaque naturæ pandens miracula Buffon;
 Vosque adeò quibus alta leves ad culmina Pindi
 Gratiæ iter fecere, Chorumque venusta decentem
 Sevigne inducit, cui candida epistola dextrâ.

Me juvat heroas, veterum décora alta videre
 Seclorum: hic nostris inhiantes Malleus oris
 Contundit Mauros, Carolus centum ille subegit
 Et centum valido texit tutamine Reges,
 Nec patrias unquām leges aut foedera tem̄sit.

Guesclinius juxtâ Reges virtute supremâ
 Eminet , integrâque fide Bayardus , et isti
 Tu propior Catinate ævo , sapiensque Torinnî.

O Deus , immensum justo moderamine mundum
 Qui regis , hanc tandem placato lumine gentem
 Aspice , quæ miseris tot casibus acta , nefandos
 Ingemit errores , et , avito reddita sceptro
 Clementem memori Regem veneratur amore :
 Optatâ cum pace , Deus , de sedibus altis
 Virtutum nobis agmen demitte decorum ;
 Mitte et Amicitiam , quâ non mortalibus ægris
 Dulcissimum unquam munus , Deus , ipse dedisti ;
 Lux tua consiliis præfulgeat , atque fideles
 Recta magistratus ad verum semita ducat ;
 Da nostri te digna canant mansuraque yates ;
 Et nostri tua percipient miracula Docti ;
 Virginibus tenerum nostris infunde pudorem ,
 Et puros animi sensus , castosque lepores ;
 Concordi benè nupta viro , placidissima conjux
 Ornamenta probos sibi amet pulcherrima natos ;
 Uberibus semper nostros da messibus agros ,
 Da semper colles tumidis gaudere racemis ;

Atque utinam ille tuæ sol majestatis imago
Hâc possit Patriâ nil unquam visere majus.

Nunc saltus iterum et sylvas subeamus opacas,
Findit hiulca æstu dum sol rapidissimus arva,
Nec nisi per sylvas spatiis reperitur amœnis
Frigus, et herbarum, zephyri cum flamine, odores.

Armeriam staticen juxtâ cistosque coruscos
Cæruleâ viridis Veronica surgit aristâ;
Resinosa suo se Chamæpithis odore
Imas ad pinus prodit; lactentia acerba
Brachia protendit viridanti Euphorbia fœtu;
Emicat inculti suavissima gemma Dianthi;
Incultasque rubent benè olentia fraga per herbas.

Ut benè moratâ nos vivimus urbe, silentes
Sic Plantæ inter se variis in saltibus. Ultrò
Ad commune bonum conspirat quisque, tuentur
Infirmos validi; patronorumque quotannis
Ritè caput memores exornant flore clientes.

Asper acuta rubus protendens spicula, fidi

Nocte dieque vices agitat custodis, et acres
 A plantis morsus pecudum nascentibus arcet.
 Mille alii frutices, examen amabile, læto
 Dant faciles fœtu baccasque nucesque drupasque.

Soles post aliquos huc undique rustica pubes
 Certatim studiis alacris ferventibus ibit;
 Et croceas viridi nuculas è termite pastor
 Demittens, animo dabit exultante puellis.

Interea celsos tollunt ad sidera ramos
 Quercus, et Ornus Acerque, et vertice Fraxinus alto.
 Quarum nonnullis salcârunt fulmina frontem,
 Ast aliæ antiquam fatis felicibus umbram
 Extendunt, nullo nec læsæ vulnere regnant,
 Propitiumque sibi diyûm testantur amorem.

Illarum suprema inter fastigia nidum
 AEdificat longè rivali corvus ab omni.
 Arboreis verò foliis errantia nunquam
 Agmina dinumeres animantum. Scilicet imâ
 Ab radice ubi serpit iners Hypnum inter arenas,
 Ad rami extremum superis qui diffugit auris,
 Vivas mille atomos enutrit rimula quæque,

Nodum et quemque habitat plebecula plurima , primo
Vespere quæ vitam claudet , manè orta , senilem.

Dùm lux alma datur , vitales mittit in altum
Sylvaauras, vegetantem animam queisducimus omnes ;
Arborum enim fibris radices acribus ima
Telluris penitus subeunt , laticesque profundos
Exsugunt , nubes qui deindè feruntur in altas ,
Montanis lacubus ne linquat Oreadas tunda ,
Lætaque ut innumeris humescat fontibus arva.

Magnifici ô flaviique lacusque et stagna quieta ,
O vestros mihi thesauros aperire virentes
O utinàm liceat , madidosque subire recessus ,
Ponit ubi imbellis placidum querquedula nidum ;
Et vestris ortos latebris discernere juncos ,
Squammosæque humiles hortos cognoscere gentis !

Florentes intèr felici gramine colles
Consistamus , ubi longo sanmauria prata
Circuitu illabens lætissima Matrona lambit.
Illuc immuneræ salices pendentibus undas
Occultant , rectis vel tangunt sidera ramis.
Magnificus , salicūm folia inter glauca , Cerambix
Umbrosas roseo ripas inspergit odore.

Surgentes vitreas parte ex utrâque per undas
 Nymphææ latis fluviale tapetibus æquor
 Internunt ; flore Erigeron flavente , rubensque
 Desertas hinc indè tegit Salicaria ripas.
 Tuque ô candentes nivæo , Convolvule , flore
 Urceolos crescendo rubos appendis ad omnes ,
 Omniaque innumerâ vacua intervalia coronâ
 Intexens , variis das vincula mollia plantis.

A villâ procùl haud nunquam mihi manè vaganti
 Se lacus incultos per montes objicit , omnem
 Cui tegit humiferis tenebrosa vaporibus oram
 Bruma ; sed hos postquam radiis penetravit acutis
 Phœbus , in aërios consurgunt undique tractus ,
 Jamque lacus lucere , levesque evadere in auras
 Et spectrorum instar per sylvas ire vapores.

Splendida tûm mihi se circùm undique pandit imago :
 Rupibus impositæ rupes in margine aquarum
 E rimis numerosa altis virgulta sub auras
 Exertant , viridisque cubilia mollia musci
 Mollis hyperboreæ non vincit pluma volucris.
 Spinosæ sub aquâ levis ambulat arcula trapæ ;
 Æolio si quis ventorum elapsus ab antro

Seditiosa lacūs miscet vada , plurimus imam
 Ad ripam ante pedes fructus mihi pellitur æstu.

Sic fontes intèr vitreos plantasque salubres
 Doctrinæ studio versari sedulus Atys
 Gaudebat , profugæque vigil pretiosa juventæ
 Lucro apponebat festinâ tempora curâ.
 Bis denos ætas vixdùm compleverat annos ,
 Finitimis circùm ille locis jàm noverat omnes
 Plantarum species ; nec eum unquàm fallere euntem
 Subtus aquâ trepidæ poterant resonante paludes ,
 Ardua præcipiti nec pendens culmine collis.
 Plantarum ille habitus oculo observabat acuto ,
 Et quod sit cuique ingenium , quo denique more
 Quæque adolescat ; ubì verò aspirante Favonî
 Molli aurâ nonnulla sinus aperire feraçes
 Cœperat , ipse loco nascentem carpere florem
 Et chartâ insertum duplici exsiccare , peritus
 Naturæ formam et proprios servare colores .

Sic Atys. Studio sed et illi insignis eodem
 Concordique fuit dilecta Lucilia amore.
 Cui decus egregium formæ excellentis , at ipsâ
 Formâ animus longè fuit excellentior. Uno

Rure utrumque tenet Morrencia Vallis , ibidem
 Jâm vinclo dulci conjungere utrumque parentes
 Unanimique ipsis Hymenæus Amorque parabant.

Anno quoque diem natalem virginis illic
 Festivis celebrare choris ludoque solebant ;
 Tunc ludi mutare locum , sylvæque virentis
 Frondosâ festum statuunt agitare sub umbrâ.
 Jussus amans ornare locum , proficiscitur ardens ;
 Consiliis tenerum variis depascit amorem ,
 Detrahit inceptis , addit , mutatque vicissim .
 In sylvâ arboribus vacuum patet , atque per umbram
 Circumfusam hilari spatium penetrabile luci ;
 Hic ludit zephirum blandissima turba ; dieque
 Vel mediâ nitet , auroræ ceù frigore , gramen .
 Ipse altos circum ramos inflectit in arcus ,
 Lætaque festivis intexit vincula sertis .
 Hæc subter , viridante torum de cespite fingit ,
 Dilectumque sibi , nivea inter lilia , nomen
 Inscrabit , facilique fluentia carmina venâ ,
 Facundo nunquam cunctantia carmina amoris .
 Tunc opere ex votis perfecto , crastina latus
 Gaudia prælibat : quâ mente puella sub arcus
 Ingressura , genas quo perfusura pudore ,
 Addita quânotâ dextrâ ornamenta videbit .

Involvunt sylvam tenebræ ; tonitusque tumultus
 Quo dudum reboant longinqua cacumina , multo
 Nunc sonitu propius , magnoque fragore minatur.
 Et salve , Atys ait , felix ô sylva ; beatos
 Cras subitura tuos dilecta Lucilia ramos.

~~Hinc~~⁺ ergò truces ventos tumidasque procellas
 Amoveat procul et blandis Amor advolet alis ;
 Et nullo doleat commota Lucilia casu !

Has dum voce preces effundit supplice , nubem
 Rupit et æthereus miseri latus abscidit ignis.

Se postquam rutilo sol aureus extulit ortu ,
 Continuò celeres alaci de rure puellæ ,
 Ornatæ nitidos cyanisque rosisque capillos ,
 Vimineis cererem lectam caseosque recentes
 Imponunt calathis , cerasorum et dona suarum ,
 Omnia nam cerasis arva illa seruntur opimis.

Ad viridem in sylvâ lætissima ducitur arcum ,
 Haud nempè horrendi præsaga Lucilia fati.
 Festivos modulando sonos ad limina nota
 Deveniunt ; ipsa ingreditur ; verum arida subtèr
 Virgulta exangui deformem aspexit Amantem
~~Hinc prius~~ — — —

Vultu , incumbentem semiusto pectora truncō.
 Te-ne , ait , Atys ! Et ægra , amens , præcepsque dolore
 Labitur , exanimisque , ipsique simillima morti .

Suscipiunt miseram sociæ , flentesque gravatum
 Sustentare caput , mutosque levare dolores
 Conantur , gelidamque invisâ abducere sylvâ .

Per menses octo , ingenti deperdita luctu ,
 Amissum infelix videt usque , usque audit Amantem ;
 Nec sociarum unquam , nec vocem audire parentum ;
 Pectore sed tacito gerere immedicable vulnus .

Quas modò dilectas studio dulci ipsa fovebat ,
 Non valuêre hiemis Plantæ tolerare pruinias ;
 Disperiére omnes . Crudeli ipsa ante senectam
 Tabe peresa , diem modò erat subitura supremum .

Advenit ecce puer , flendo qui multa , parenti
 AEGrotæ flores poscit miserabilis aptos
 Qui celeri valeant morbū exegisse medelâ .
 His ad se meminit revocata Lucilia Amantem
 Heu ! miseros nunquam non exaudire vocantes .
 Tunc afflita gravi sustollens membra dolore ,
 Conatur pede non firmo se ferre per agros .

Aureus eois consurgens Phœbus ab undis
 Luce renascenti colles spargebat; amico
 Experrectæ omnes paulatim sidere plantæ
 Údum efferre caput, floresque aperire coruscos.
 Purior ambrosiis spirabat odoribus aër.
 Frondosis micat è latebris genus omne volucrum;
 Hæ per aperta petunt nidis vocantibus escam;
 Illæ, dulcisono dumeta per obvia cantu,
 Dulcia jucundi modulantur gaudia amoris.
 Lætantes audit gemebunda Lucilia, at ipsâ
 Parva legente altæ miscetur salvia rutæ.
 Hæc etiàm coquit ipsa redux, ægræque salubrem
 Dat, triduo quâ tetra lues fugit acta, medelam.

Officio jàm tûm generosa puella benigno
 Mœrorem solata, Atymque imitata, virentes
 Per campos errare, bonasque excerpere amabat
 Queis, ut et ipse, inopi quiret succurrere, plantas.

Vos ergò per agros ite, ô quibus aspera menti
 Tædia, vosque artis studium quibus acre medendi,
 O Amythaonii, juvenes, Chirontis alumni,
 Ite: hominum tristes miserantia Numinæ morbos,
 Pollentes plantas ad quemque dedere levandum.

Omninò tria constituunt primordia plantas :
 Oxygenum , Hydrogenumque , et nigro carbo colore
 Hæc almæ diversa togam primordia terræ
 Pictorum variis florum ornavere corollis ;
 Diversas et opes , ut cujusque indiget usus ,
 Diversis genera aptando r gionibus , aptant.

Importuna senem si quand  tussis anhelum
 Spasmatibus crebris quatit , humectante syropo
 Permulcens violae sedat pr cordia succus .
 Febrili si fors plaga arserit aspera flamm  ,
 Lilia densa levant coctis radicibus aestum .

Aspice ut ad Trojam dejectis vulnere Atridis
 Dictamnum medic  fert callidus arte Machaon ;
 Et , mora nulla , *imo stetit omnis vulnere sanguis ,*
Excudit et docilis , nullo cogente , sagitta .

Divitibus dulces admota papavera in usus :
 Quem juvat angusto sapientum insistere tecto ,
 Nemp  superba levi somnus penetralia penn 
 Qu m fugeret , cruciatur ubi anxia cura sub auro ,
 (Quid non diviti  possunt !) nova planta feraces
 Usurpat sulcos , sensim et lactentia fundit
 Pocula , pacales Morphei imitantia succos .

Sicubil Sparta fuit , dictæque à Pallade Athenæ ,
iuxta Argos veteres , Agamemnoniasque Mycenæ ,
andida fragranti sese rosa tollit odore ,
nobilibus quondam , per se nunc nobilis , arvis :
Iujus Reginis humor servatus in auro
nectareos vincit latices , quibus ipsa deorum
œlestes quondam mensas regio illa beavit.

Dudum per sylvas et quæsivere per agros
i qua levare gravem possint medicamina amorem ,
Quippè aliquas rati succis felicibus herbas
Ægris posse animis optatam afferre quietem ,
Emollire alium rigidâ asperitate superbum ,
Et revocare levem pristina in vincula amantem .
Frustrâ. Solis enim doctissima filia Circe ,
Vertere naturæ potuit quæ carmine leges ,
Inque feras jucundo homines mutare veneno ;
Et quæ , Thessalici succensa herois amore ,
Impia sopivit patrios Medea dracones ,
Infidum nunquam valuere reducere amantem .

Quæ desunt , ne nos dotes quæramus in herbis .

Numquis eas numerare queat quibus infima abundant
Herbarum genera ipsa ? Humili propagine muscus

Lapponas fovet et Lapponum dulcia cervis
 Pabula dat , nidosque avibus , cunasque sciuris.
 Ipsi etiām musco debentur mille colores ,
 Splendidaque innocuæ spectacula in aëre flammæ.
 Humida si densi viget usquām copia musci ,
 Illīc sub terrā vitrei latet unda fluenti.
 Montibus inspersus summis et collibus , arvi
 Labentis tenui reparat radice ruinas ;
 Olli namque hærent pulviscula , ruderā , arenæ ,
 Arida quæ tumidæ verrendo rura procellæ
 Circūm altos rapido sustollunt turbine montes .
 Per loca saxorum cava , per latera ipsa , retentis
 Ruderibus , Boreæ victricia germina aluntur.
 Plurima ubique virent , nascentes undique sylvæ
 Humiferos ad se sensim alliciendo vapores ,
 Effundunt vitreos omni de vertice rivos .

Tenuia pratorumque et agrorum munera , flores
 Pinxit acu doctâ Tritonia diva , levique
 Longa inter filo sinuosi stamina pepli ,
 Purpureasque rosas et jasmina texuit alba .

His quoque cælantur Regum diademata , et ipso
 Alta columnarum capita exornantur acantho .

Virtuti qnām multa dedit , quām multa fideli
 Pignora amicitiæ , monumentaque dulcia , Flora !
 Nobilia obscurā quot nomina nocte laterent ,
 Immortale decus nī flosve arbosve teneret !
 Divitiæ pereunt , vis et vigor interit omnis ;
 Quod struxerē homines pede sors inimica superbo
 Prorait , ipsorumque ferit caput impia Regum ,
 Regalesque domos et signa evertit ahena ;
 Sed commissa sibi , fatorum arbuscula victrix ,
 Nomina in æternum fert , ære perennior , ævum .
 Scilicet hæc renovant verisque hiemisque vicissim
 Perpetui reditus , neque diluet ulla vetustas .

Tanta tibi , ante alios , debetur gloria , Docte
 O Linnæ , tuā densas qui luce tenebras ,
 Ut Deus , immensamque diremisti ordine molem .
 Terræ visceribus quidquid natura recondit ,
 Quidquid in aërio tractu , vel spirat in undis ,
 Quidquid vere sovet genitabilis aura favoni ,
 Omnia tu vidisti , aliisque videnda dedisti .

EXPLICIT BOTANICÒN LIBER SECUNDUS.

BOTANICÔN^A

LIBER TERTIUS.

Quum cœlo micat æthereæ spectabile Libræ
 Sidus, et exæquat placidas cum luce tenebras;
 Pampineis cinctus foliis Autuminus et nyvis,
 Hortorum imperio, cedente AEstate, potitur.
 Omnigenas, pleno quas fundit copia cornu,
 Inter opes, risusque, et alacria gaudia, rure
 Quam juvat Autumni dulces traducere soles!

Vos quorum vitreis illimis Matrona lymphis
 Lambit agros, vosque ò quos Bacchi munere dives
 Collis alit, dictus non frustrà collis ab auro,
 Lignea nunc resonent læto reparata labore
 Dolia, nunc uteros nova cingant vincla rotundos.
 Jam gravibus plaustris advecta, cadisque rubescens
 Effusis, spumat plenis vindemia labris.

Aonii primus qui per juga lubrica montis,
 Ardua Botanicam Musarum ad limina duxi,

Austeræque modos mollivi carmine linguae,
Ipsiæ ecce iterum fidâ cano munera voce.

Semina jàm florum quos nostra ubicumque tulere
Arva, vides flavo nûnc maturescere culmo.
Quorum pars impunè leves agitata per auras,
Graminibusque diù densis abscondita, tandem
Germinat; undè ultrò fruticum propago renasci,
Et renovare solet viridaria læta Cybele.

Cætera sollicitus vigili nisi semina curâ
Rexeris, intereunt nullâ reparabilia arte:
Sic ea quam miseris relegenda in messe relinquunt
Agricolæ, nulli mox apta periret arista.
Felices, quos sponte tulit lætissima, fœtus
Materno indulgens Natura educat amore;
Non itâ quos multis operosa industria curis
Excolit. Ignavâ si fors rubigine torpet
Vomer, mœsta Ceres neglectis exulat agris,
Atque horrens redit infaustâ propagine sylva,
Lappa tenax, ebulusque nigrans, et carduus asper.

Naturam proprius scrutari, et tollere densa
Vela juvat quibus illa solet sua condere sacra:

In gremio florum quantâ nova semina curâ ,
 Quantâ arte effingat , libet inspexisse. Veterno
 Confusa æterno qui germina prisca diremit ,
 Et formam dedit , et certis parere coëgit
 Legibus , ille suis habitari animantibus orbem
 Nascentem voluit. Qui verbo scilicet uno
 Dixit , et ecce leo desertâ irrugiit orâ ,
 Sese aquila in superas ausa est attollere nubes ,
 Atque erexit homo sublimem ad sidera vultum.

Sed nudi montes , importunoque paludes
 Obductæ limo , semper deformia visu
 Arva ostendebant. Jussit Deus , atque virenti
 Veste velut sese lætissimus induit orbis ;
 Jussit et ille novis terram annua munera frugum
 Præbere hospitibus , fœtusque edendo perennem
 Quamque suo gestare sinu sua semina plantam.
 Sic humilis viola , ingenti sic tegmine quercus ,
 Omnis et instruitur miris genitalibus herba.
 Nempè leves medio surgentes flore columnæ
 Fœcunda è summo pulviscula vertice librant ,
 Quæ super utriculos stillantia segnibus æstum
 Seminibus vitamque per intima viscera mittunt.

Mox cedit elanguens, marcetve effœta corolla,
Primitiasque novi jāni fas discernere fœtūs.

Seminibus tamen instructæ non semper eosdem
Plantæ habitare locos debent; namque aridus illas
Excipiet vertex, has humida ripa paludis;
Et variis varium semen stationibus aptum est.

Montibus apricis si qua immaturiit, altas
Alitibus similis volitare exultat in auras;
Atque olli, quâ se tollat, data crista volucris,
Aut levis ala, apicisve agilis plumosa supellex.
Subtili, sic artis opus, globus aëre plenus,
Se postquam dubio motu libravit, ad astra
Consurgit, summoque minantia castra volatu
Desuper explorat, trepidantesque arduus urbes,
Hostilesque vias, artesque, minasque, dolosque.
Quo duce, Florusiis nutans victoria campis,
Impigra Francigenum tandem vexilla secuta est.
Seminibus, liquidas studium quibus ire per undas;
Pro pennis diversa, levi pro casside, cymba est.
Decedente die pars vela dat, atque silentis
Æqua lacūs, stellis ducentibus, æquora lustrat;

Cætera remigiis , adverso flumine , Iembos
Molitur , facilisve secundo defit amni.

Sic et in oceano , plantarum plurima classis
Immensem spatium , nullo duce , navigat , atque
Desertis passim nova mittit semina ripis ,
Orbis et extremos attingit denique fines.

Germina ne lædant latices inclusa , phaselus
Undique consultur mirâ impenetrabilis arte.
Quin et sæpè , ut aquas aditu prohiberet ab omni ,
Naviculæ ceram toti natura tenacem
Illiniit. Tali defensa indumine , lata
Flumina ceriferæ transmittit bacca myricæ ,
Nocturnos quæ munus apum benè supplet ad usus ,
Multaque planta suas quam læta America per undas
Nare videt. Vos ô , sapientis libera Penni
Progenies , facili dûm pax favet alma labori ,
Fœcundæ telluris opes expromite ; opimos
Vastorum viridi Fluviorum in margine , et altis
Mille jugis latè circùm quæ vestra coronant
Arva , manu haud segni , tām ditia mūnera , fructus
Colligite , et nobis vitalem emittite ad usum.

Jàm nostris passim ornantur splendentibus horti
 Asteribus ; jàm magnifico sub tegmine euntes
 Cedrorum , vacuis vestra acta evolvimus horis ;
 Hùc tám multa venit vestris è saltibus arbos ,
 Ut , sæpè insidens peregrinâ Gallus in umbrâ ,
 Nesciat in patriâ ne , recenti an vivat in orbe.

Delicias inter quas copia tanta novorum
 Præbet alumnorum , venturi cura sit anni.
 Qui dudùm inclusus cellâ interiore jacebat ,
 Nûnc fugiente , solum florale revisere , somno ,
 Bulbus avet : certo quod nuntiat indice gemmans
 Summus apex , frondesque novas jàm sponte virescens .
 Ne brumam expécta. Læti blandissima turdi
 Vox ubi ad attentas in sylvis personat aures ,
 Splendeat in manibus rastrum , floresque futuros
 Defossâ accipient apta incunabula terrâ .
 Ordine quodque suo genus hîc depone : reclinem
 Narcissum , et croceam quæ multum fundit odorem
 Jonquillam , et miseri heu ! pueri monimenta Hyacinthos .

Flos thalamo tím quisque repullulat ; atque parentem
 Undique præcingit natorum densa corona .

Nunc etiàm sese nobis olitorius hortus ,

Optima commendat virtutis imago modestæ.
 Quot namque areolis accepit idonea cultis
 Semina , coliculi totidem nunc undique surgunt ;
 Quotque in flore novo poma induit , utilis arbos
 Tot matura tenet pendentibus undique ramis.

Gallica si qua olim celebravit versibus hortos
 Musa , diu passa est insani tædia fastus ;
 Nec sine circuitu verborum dictus inani
 Faseolus , spiris ramo innectentibus hærens ;
 Daucus et auratus , rubicundaque Beta superbam
 Aurem offendebant , quantumvis grata palato.
 Non ita nunc ; Musæ nec dedecus afferet ullum.
 Agresti , solidum si crispa tumescit in orbem
 Brassica , ab Insubriâ nobis transmissa feraci.

Forsitan inductis Apium mitescere fossis
 Disceret et candere , Rumexque extrema viarum
 Ordinibus longis ornare , virereque ad undam
 Scandix ; hibernoque ad murum sole rēfota ,
 Primo vere daret frondes Lactuca tenellas.
 Non verò tam multa decet tentare ; venustas
 Haud radiore aliquot describere carmine plantas
 Sit satis : instar apis temere huc volitantis et illuc ,

Candida nūnc inter gelsimna , novosque dianthos ,
Me juvat hōrtorum comptos cecinisse lepores ;
Nūnc saltus sequor umbrosos veneresque remotas.

Vos , loca qui tepido recreatis frigida flatu ,
O Gnomi , Sylphique , virens quos detinet umbra ,
Antrorum convexa ulniōsque relinquite celsas ;
Vosque levi pennā tenuissima turba deorum ,
Manē leves roseo qui spargitis æthere rores ,
Et levia aëriis agitatis nubila in oris ,
Semina fungorum , cunctos fallentia visus ,
Per placida occultā nemora , ite , inspergite dextrā.

Mortales oculos hebetans , nox humida velis
Lascivosque deos operit magicumque laborem.
Cuncta sed exoriens sol detegit : undique surgunt
Cauliculi sine flore ullo , sine fronde ; sed omnes
Protecti lato orbe caput , variique colorum.
Pars diversa locis , soli in stationibus astant ;
Verūm alii , ut fratres decet , unā in sede morantur,
Atque ulmos inter muscosas agmina amica
Conspexisse juvat , sociataque castra. Sed hostis
Jām terebrā tentare ipsos non unus , edaxque

Immisisse genus. Prædâ properemus opimâ
Antè frui ; nihil est BULIARDO dante timendum.

Fumosâ indutus tunicâ , Boletus edulis ,
Candida nectareo præbet pulpamina odore.
Campestres illic , epularum gaudia , crescunt
Agarici , quos sæpè suis ars imperat hortis ;
Hic inter varias Albellus pullulat herbas ,
Atque Aurantiacus posuit tentoria dives.

Lenæo dilecta filix , invisa sed almæ
Frugum inventrici , mediis nunc floret in arvis.
Cujus in exiguis abscondita semina nodis
Ostendisse libet sub fronde hærentia ; at alto
Intonuit latè tempestas horrida cœlo :
Insani vada commôrunt Neptunia venti :
Infremuere procul freta ; terrificoque fragore
Fumosi feriunt spumantia littora fluctus.
Nunc properemus ; opes nunc vastâ effundit in orâ
Oceanus. Tantas numquîs penetrare sub undas
Atque profunda queat miracula tangere , ab imis
Nereïdum nisi tempestas avulserit arvis !

Nosira quot effulgent per prata , tot æquore in ille
Pubescunt variî variâ propagine flores.

Quām diversa novā per pontum corpora formā
 Condidit, ipsa etiā Fucos natura marinos
 Per caulim voluit vesci, radice carentes;
 Viscoso circūm perfusi glutine, summos
 Apprensis strictūm per caules rupibus hærent.
 Expedit his omnis locus: innascuntur in omni
 Rudere, cæruleæque inter laquearia divæ;
 Insiti et in rutilis conchilibus, ardua circūm
 Saxa sīmūl dorso scopulosque veluntur opaco.
 Nullā ope multi alii, super æquora salsa natantes,
 Insternunt viridem oceanī per summa tapetam:
 Tercera gramineis ità cingitur insula zōnis,
 Tercera, vicinæque aliæ, quibus imperat, octo;
 Sæpè ubi tristis hyems tempestatesque sonoræ.

Ut splendere dedit Fucis natura marinis,
 Sic illos non ulla potest abolere vetustas.
 Avulsos postquām violentia rupit aquarum,
 Oppressitque diū sterili ingens agger arenā;
 Si tetigit fluctus, mora nulla, erumpere rami
 Surgentes, jāmque ipsa novis revirescere geminis
 Planta, novosque natans agitare per æquora flores.

E pelago egressi, jām nos orientis in oris

Quæramus nova per medias spectacula terras.
 Impigra mens levibus pennis exsurgit, et omnes
 Antiqui tractus volitando amplectitur orbis:
 Nunc Germanorum mores observat et urbes,
 Sarmaticosque audit gemitus, secundaque latè
 Littora miratur quæ Volga interfluit ingens;
 Cernit et eximias Thibeti in montibus herbas,
 Parcarum tacitâ quæ vim virtute repellunt;
 Sinarumque sequens longum rapido impete murum,
 Ulteriore hilaris tandem requiescit in orâ.

Hic bis quinque virûm sublato millia signo,
 Agminibus variis colles atque avia lustrant
 Arvorum, villas non vastatura nec agros,
 Nec prædas nemorum è latebris raptura cruentas.
 Montibus in vestris ergò, genus omne ferarum,
 Dilectas intèr socias, prolemque tenellam,
 Pascite, securosque agitate per otia ludos.
 Bellica turba nihil, nunc pacis amica, silentes
 Per sylvas quærunt, nisi plantæ munera opimæ.
 Hunc et in abrupto torrentum margine, et imas
 Ad rupes, et saxorum in radice minantum,
 Aut nemore in medio, foveæ vel ad ostia cæcæ,
 Inveniunt panacem optatum, facilique reiectum

Indicio ; radii nàm tres in vertice summo ,
 Quorum quisque caput folio quino impare inumbrat.

Autumni ex ortu , rigidæ usque ad tempora brumæ,
 Iudefessa phalanx deserta immensa peterrat ,
 Et carptis opibus telluris onusta , peracto
 Munere ovans , sese reginam vertit ad urbem.

Interea mutata novos natura colores
 Induit; antè errans, primo sed frigore pressus
 Humor plantarum , vario diversa rubore
 Illustrat folia , et nemorum vela inficit auro.

Conspicienti ácerem præcelso in vertice montis
 Splendere auricomò tūm sole videbitur arbos.
 Hoc verò tantum decus , ornamentaque tantā
 Non mihi tām rident , viridis quām dulcia veris
 Tempora ; nām tristem fugitivā abscedere pompa
 Autumnum reproto mōrens ac multa revolvens.

Vallibus in mediis , sinuoso ubi densior annem
 Labentem insequitur flexu vapor , humida flores
 Nūnc quoque , pallidulos sed fundit frigore tellus.
 At seræ , collis jūga per declivia , plantæ

Umbellas gelido curvant horrore rigentes.
 Hic surgit lucidus, Scabiosa, fidelis imago :
 Nulla infelici planta est tam dulcis amanti,
 Namque procellosis ipsa est obnoxia nimbis.

Te si fata, mihi si te nimis aspera fata,
 Odulcis conjux, rapuissent... si qua parentis
 Ira domo, o superi ! tenerum amovisset amantem ;
 Te ve sacris, ubi nunc sola atras noctua voces
 Nec quicquam ingeminat, claustris vovisset... at ecce
 Vivis, Elisa; mea es, mea dulcia gaudia sola es.

Per medios urbis strepitus, tranquillave ruris
 Otia, semper ades mihi tu, comitaris et absens.

Multa observanti si quae mihi digna videntur
 Quae mentem advertas nec inanem, curio ferenda
 Laetus. At inumeras nunc undique cerne volucres
 Hac procul est regione simul migrare parantes :
 Scilicet a plantis atque autumnalibus illae
 Indiciis ad iter tantum, anno quoque, moventur.

Nam tempestatum simul ac, et munere solis,
 Venturis avibus stat copia certa ciborum;

Tum libycis illæ certatim excedere ripis ,
Et petere aërio borealia littora cursu.

Dispositas at ubi variis regionibus escas
Consumpsere, fugam parat undique quisque; tumultus
Undique, conventusque; cohors tum quæque vicissim
Avolat, atque uno procedens agmine, lætas
Non intermissis repetit fervoribus oras ,
Quò vocat immensis nova jam seges aurea campis.

Nunc etiam timido nulli per inane volatu
Pennam agitant, nec iter sed enim novêre paternum;
Sæpius et querulam ducentes gutture vocem ,
Respiciunt natale nemus primosque penates.

Dilapsis avibus, pomorum cincta coronâ
Pomona ecce venit, spemque anni fertilis implet.
Undique concussâ creber pluit arbore fructus ;
Malorum aggestis jàm torcularia acervis
Exundant, cupæque, et dolia cuncta ; gravique
Sub molâ obteritur per gyros dulcis eunte
Copia. Cur succum, quem non benè nôrat, amaris
Vocibus, Aïaci facundus præco Lyœi ,
Campanæ gentis mores oblitus avitos ,

Increpat? Ille suas ad cœlum laudibus uvas
 Tollat, et ambrosium spumosâ aspergine odorem:
 Mali felicis generose ô Nate, virile
 Illi infudisti Normanno robur, adustis
 Qui ratibus fidens domuit fera corda Britannos.
 Ipse tuâ virtute vigens Cornelius altam
 Melpomenæ erexit parisino in littore Scenam,
 Dignaque Romanis depromisit carmina gestis,
 Romanosque dedit nobis audire vel ipsos.

Dulcia tu reddis torpenti gaudia musæ,
 Spuma tuo si candidior super infremit auro.
 Quæ fallente mero redit usque, et sævior ardet,
 Te, mora nulla, fugit rorante exterrita febris.

Agricolæ non continuâ, quæ te dedit, arbos
 Curâ eget; ipsa sibi satis est, opis indiga nunquam;
 Tàm multos, nullo auxilio, dat prodiga fœtus.

Gaudet et ipsa Ceres hâc arbore; namque sub umbrâ
 Ramorum, felix contemnit arista procellas.
 Ergò dapem nobis ager idem et pocula profert.

Salvete, ô densæ queis gaudet Neustria, mali;

O utinam vestri latices mihi , nectar avitum ,
 Si contemptoris maledicta proterva refelli , -
 Explevisse meum dent , nec sine honore , laborem !

Dilapsæ longo Sylvarum in margine frondes
 Instravere vias , imisque paludibus humor
 Emanat tristis , brumasque inducit opacas ,
 Immensisque operitmœrentes nubibus agros ,
 Et se lugubri texit velamine Phœbus.

Quem frustra lachrymans et supplex terra precatur
 Maturare pigros fructus et semina sera .
 Non maturescent ; impuro namque nefanda
 Mucore infecit putredo cuncta , nec ipsos
 Pendentes ramis fructus obscœna celeno
 Abstinuit fœdare , cavâque abscondita capsâ
 Semina , turgidulâ jàm lactescientia palpâ .

Pestem verò istam natura aliquando repellit .
 Cæruleo splendore polus , blandique calores ,
 Sudus et à zephyris aër libratus amicis ,
 Cuncta fovent lætos , ut verno tempore flores ;
 Cuncta mihi per agros , ut verno tempore rident .

Nonnunquam infausto terram quoque vidimus æstu

Torridam , et Autumni per tempora tota salubres
 Nec quicquam roris latices pluviasque rogantem :
 Funerei cœlos obscuravere vaporess ,
 Ipse quasi extincto deformis sidere , Titan
 Lugubri infandum ferrugine squalluit; altas
 Unda tumens pelagi spumescere semper ad oras ;
 Plura polo nunquam cecidérunt fulmina , et atris
 In noctis tenebris horrendæ arsere cometæ.

Germani magno Iberique timore pavebant ,
 Quum vestræ , miseri , tristissima fama ruinæ ,
 O Calabri , advenit. Vastâ sub mole Vesevus
 Ecce furens iterum horrendo mugire fragore ,
 Et fumum ingentem ad nubes piceamque procellam
 Ignivomosque imbræ barathro eructare tonanti.
 Protinus erumpit magno impete flamma , reclusis
 Culminibus , longoque rubentia turbine lambit
 Sidera ; tūm liquefacta imo de gurgite saxa
 Surgere , et è mediâ pulsata tonitrua terrâ.
 Sulphur et exundans ardenti mole bitumen ,
 Amne simul rapido , montis latera ardua sulcant ;
 Et valles ineundo cayas , imitantur avernî
 Tartareosque lacus phlegetonemque fluentum.

Antiquas horrenda tenent incendia sylvas ;
Sæpè feræ notis pavidæ insistendo latebris ,
Antè pererratis relegunt vestigia retrò
Tramitibus , pulsæ propioribus undique flammis.

Tristi monte procul , tectisque ardentibus , ipsi
Pallentes fugere homines , et passibus errant
Incertis : titubans ætate metuque senectus ,
Labentem adjutans uxorem sponsus , et ulnis
Spem solam , natum mater complexa tenellum ;
Frustra : nàm rapido maris unda fragosa tumultu
Devastata novas infert in littora clades.
Mota Apennini juga contremuere ; profundis
Visceribus fumos vomit undique terra dehiscens ;
Ipsaque quassa ruunt firmissima mœnia , et imos
Ad manes vastâ lapsa oppida tota ruinâ.

Fortè erit , attoniti , post sæcula multa , nepotes
Ut tandem mole inveniant oppressa sub altâ
Oppida , templa , domos , decorata palatia magnis
Porticibus , mirabilium monumenta laborum.
Sic apud antiquam , fortis quam condidit olim
Alcides urbem , simili quæ postea clade

Corruit, insignes ipsi invisisse ruinas
Imus, et effoso veterum studuisse labori.

Quid de tot miseris quos tanta ærumna reliquit?
Per loca pumicibus fumoque et plena favillâ,
Cuncta ubi combustis arserunt horrea granis,
Desertos per agros, perque arida prata, juvencos
Agricola inquirit nec quicquam; torrida nullus
Arva eheu! superest duro inversurus aratro.
Nil opis, ac misero spes nulla. Dapem unde gementi
Uxori inveniet prolique? An quercubus ibit
Concussis pastum in sylvas? At ubique nefanda
Horrendis grassata modis tempestas; tristis et arbos
Ærumnam cumulat, radicem ambusta vel ipsam.
Tunc cineres inter, laceris circumdata pannis,
Apparet miseranda fames; erransque per agros
Perque urbes, primùm angustis irrepere tectis,
Deinde superbarum transgressa quoque alta domorum
Limina, in auratas penetrat penuria sedes.

Interèa immites Erebi Ditisque ministræ
Aëra lethali totum inspersere veneno.
Spasmata jàm crebræ quassérunt tussis anhelum
Pectus; ubi verò lux altera nascitur, ardens

Halitus incensis ægrè pulmonibus exit.
Nullus non crepitat contracti corporis artus ;
Nec tantis tamèn expuitur conatibus humor.
Seditioso igne excandescunt ora ; sed imis
Vix ire in venis torpenti sanguinem inertem
Pulsu credideris. Pondus tenuissima vestis
Immensem. Occluso flagrat ærea clava cerebro ;
Atque intestino vis morbi accensa furore ,
Vultur ut immanis , lacerat præcordia. Sævam
Post noctem , horrendo quæ tam diurna labore est ,
Nigret lingua , color pallenti lividus ori ,
Omniaque in misero sunt mortis signa propinquæ.

Tu miserum , tu nunc etiàm , spes alma , relinquis !
Uxorem jàm non audire , aut noscere natos.
Devia niens , febris rapido exagitata flagello ,
Se scandisse putat flagrantis in ardua montis
Culmina , se ve profundi in gurgitis ima revolvi ,
Et fremit immani maris æstu exterrita. Tanta
Affinis lethi sequitur deliria torpor.
Frigidus obsistit sanguis , fatoque supremo
Lumina clauduntur quartæ finem ante diei.

Hei ! loca felici quantum mutantur ab illo

Littore , ubì villas dites atque oppida læta
 Et nemora assidui florentia munere veris
 Non poterat satis admirans spectare viator !

Anno bis fœtus ovis edere læta gemelloſ ,
 Ingentes bis agro solitæ flavescere messes ;
 Melleus ex ornis labi liquor ; atque beatos
 Usque renascentes fructus ditare colonos ;
 Effluere usque gravi plenissima copia cornu ,
 Concentusque chorosque cière amor atque voluptas.
 Pastorum semper resonare canoribus Echo ;
 Rupibus è mediis secundæ assurgere vites ;
 In testudineum sese curvantia dorsum ,
 Umbrâ et odore vias hilarare virentia sempèr
 Gelsimina et lauri ; variisque canalibus undæ ,
 Hinc atque indè , velut latos errare per hortos.

Heu ! quantum subitò exitium ! quam lurida pestis
 Tàm læta invasit loca ! Tetro è sulphure nigri
 Torrentes , piceo ferventes igne favillæ ,
 A Superis omnes emissæ Acheronteque Diræ
 Tàm læta horrendo loca mutavere sepulchro.

Haud secùs imperio in magno , cui splendor inanis ;

Præcipuum at columnen , populo esuriente, fatiscit ;
Regia deliciis luxuriat , atque feroce
Exultant opibus proceres , plebique gementi
Illudunt ; miseros at desperatio , et imis
Pectoribus servens furor extrema omnia suadet .
Erumpunt subito ; ingentes cecidere colossi
Qui pressam urgebant graviori pondere terram ;
Fundamenta ruunt regni convulsa vetusti ,
Horrendaque pios ipsos traxere ruinâ .

EXPLICIT LIBER TERTIUS.

BOTANICÓN

LIBER QUARTUS.

LONGO immensarum densa undique Nubium amictu,
 Tristis Hyems fœdo nūnc sœvit in æthere; læti
 Nūnc anni periit labor; et stridore frementes
 Horrisono venti glaciem advexere nivemque.
 Nullum avium melos; hibernos exterritus Euros
 Fugit amor. Blandis Tityri pro cantibus, atque
 Lusciniae dulci modulamine, tristis aquarum
 Spumantūm fragor et caurorum inamabile murmur.

Horrendas intèr mihi, musa, serena procellas
 Aspira; jàm non rosa nec fragrantia frontem
 Gelsimina exornant; nemora infestantur et horti.

Quorum reliquias nudata per arva furenti
 Turbine miscet agens Boreas. Tu, docta precanti
 Diya aperi quæ vis ità nūnc spoliare trementem

Naturam valeat, lætosque abolere colores,
Motoresque (1) animos tristi vincire veterno.

Cœli muneribus, primo ortu, prædita cunctis
Terra, propagandæ perceperat omnia vitæ
Germina. In his tacita et nondùm discreta latebat
Copia succorum qui mox sublimia celsam
Cedrorum capita ad nubein evexere; et in illis
Non tantus, magè sed nostris accommodus oris
Humor, graminibusque et flavis messibus aptus.

Illa tenebrosis torpentia germina in alveis
Lætum expectabant, sese expansura, calorem.
Indidit hunc terræ de summo Phœbus olymbo
Illabens; placito terra exultavit amore;
Totus et ingenti celebrait gaudia plausu
Mundus, ubi deus æterno splendore resulgens
Sponsæ impertivit decùs immortale recenti.

Quæ quotiès propior ferventi advertitur axi,
Graminaque et flores immensoque ubere fœtus

(1) Vertuntur species animorum. VIRG. Géorg. l. I.

Parturit innumeros , radiis nempè excita blandis.
 Quùm verò , quæ jussit iter , suprema potestas
 Felici è centro cogit discedere ; tristi
 Nullus honos , vis nulla ; effluxit decolor ægræ
 Fronte corona. Truces , quos Phœbi lucida longè
 Arcebat facies extremis orbis in antris ,
 Cùm fremitu venti erumpunt , tristesque procellas
 Atrasque inducunt nubes gelidasque pruinæ ;
 Et quæ felici decorabant tempore terram ,
 Nùnc plantas adigunt remeare in viscera terræ ,
 Et sese tanqùam tristi occultare sepulchro.

O qui divitias immoto lumine falsas
 Temnitis , et modicum propriisque laboribus hortum
 Incolitis , nutans nùnc lento arbuscula junco
 Custodem ad murum stringatur , et utilis ipsa
 Ferri acies curvî ramos præcidat inanes.
 Hæc satís. Infestæ dûm vos circùm ira procellæ
 Ventorumque furit , vos tuta per otia avitis
 Sub laribus , veterum attentâ præcepta virorum
 Mente revolvetis , docili ve sonora canentes
 Carmina voce , etiàm seclis victura futuris
 Carmina fors ipsi vos invenietis. O ignis
 Phœbei monumenta , mihi si quando silentes

Vobiscum vigilare datur fausto omine noctes,
 O utinam vestro mea mens accensa calore
 Non indignum aliquid vobis, majusque sepulchro
 Concipiat! Tuque, alma quies, sublimium amica
 Spirituum, mihi ruinores averte malignos,
 Et frustra urbanos aditus, vacuasque loquelas;
 Divinus quippè his afflatus rumpitur. Arctam
 Claude domum, soli pateat mea janua amico,
 Si quis corde pius, sermonibus utilis, ægris
 Temporibus blandâ præbet solatia mente,
 Me, duce naturâ, naturam attollit ad ipsam,
 Ipsiusque aperit nullo conamine leges.

Si quos aspexit placato lumine Plutus,
 Illis usque virens et blando suavis odore
 Arbor, ab Hesperiis rapuit quam strenuus hortis
 Alcides, gelidæ tribuet per tempora brumæ
 Vestibulo in tepido magna ornamenta. Metallis
 Omnibus ut nitidum splendore supermicat aurum,
 Arboribus cunctis ita prænitet aurea malus.
 Sola etenim matura simul nascentiaque offert
 Poma, et perpetuos florunique et frondis honores.
 Nec pelagi tumidis expurgatum ambar in undis,
 Nec cyprio quem misit amor de littore myrthus,

Blanda nec eoæ Tithoniæ aura , fragrantem
 Quo malus nareſ beat illa , exæquat odorem.
 Olli inconcuſſo stat robore longa juventus ,
 Ipsa videt patres natosque senescere , et imo
 Quemque , annis sensim labentibus , ire sepulchro ;
 Unaque Versalicis etiam nūnc floret in hortis
 Quæ duodenorum spectavit funera Regum.

Haud procul à tectis , hibernat ubi aurea malus ,
 Exsurgat vitreæ ſpatium ſublimius ædis
 Cujus et australes et eoos lucidus unà
 Frondentis oculis paries ostendat alumnos ;
 Qui ſemper tepido nati ſub ſole , nequirent
 In nostrâ ſine vulcano conſistere terrâ.
 His ergò noctuque diuque hypocauſta per ædes
 Incaleant , longique pari circum igne canales
 Suppeditent æquum noctuque diuque calorem.

Tempore ſic etiā quo triftia rura pruinæ
 Infenſtant , varios ut verno tempore flores
 Offeret , et blandos ut verno tempore odores ,
 Plurima in angustâ glomerata arbuscula cellâ.

Hæc ut naturæ , ſic artis regna ; peritus

Ergò bene hic statuet spirantia signa Lysippus :
 Juxtā opportunæ procera umbracula Musæ
 Nos juvat immensæ sinuosa volumina pallæ
 Ostentantem Asiam spectare , micantiaque auro
 Tempora , et innumeris gemmis , tumidisque pyropis.

Africa , quæ multos posuisti ipsius alumnos ,
 Nigranti vultu , ferè nuda , habituque feroci ,
 Nec lasciva minùs , nec ineptos addit honores.

Præcipuo cellæ decori genus omne virentum
 Plantarum , fructusque novi , diversaque florum
 Copia. Ab extremis immensi finibus orbis
 Huc accerse theam Sinarum , herbamque Paranæ ,
 Et suaves Libyæ lotos , ananæque corollas ,
 Atque anthophyllum Molucarum , Amyrinque Sabæam ,
 Juniperum ante omnes illam unde emanat opini
 Thuris honos , castâ qui cum prece ad ardua cœli
 Tollitur , atque Dei mulcet placabilis iram.

Hospitibus teneris vitis conjuncta , racemos
 Undique pendentes ostendit ; et ipsius inter
 Radices fraga orta rubent ; brumæque furentis
 Secura , ipsa suos prodit rosa multa colores ,

Nix cadit intercà noctuque diuque ; at odoram
 Sylvestris , stimulante fame , mus obsidet arcem ,
 Circuitu assiduo viridantia limina lustrans ,
 Seque adeò exagitat partem indefessus in omnem ,
 Atque , ubi lœta suos traxerunt poma colores ,
 Assilit , arripiens avido nihil ore repulso.

Ast ubi hyperboreas Obius se vertit ad oras ,
 Nil plantis illic aut vitrea cella vel lignes
 Proficiunt. Illic nulla arbos crescit ; at ipsa
 Betula nana , salixque ad terram herbacea reptant ;
 Vix nostros humilis supereminet utraque juncos.

Nunquam illic menses per senos discutit umbras
 Phœbus, et ægrè alios pallenti sidere menses
 Illucet. Venti usque truces , tetricæque pruinæ.

Dura crepant lacubus solidis vestigia , et arcto
 Inclusi nequeunt innare in carcere pisces.

Turbinibus rapidis altas sublata per auras
 Nix ingens , cumulo valles revoluta replevit.
 Instabili infelix immersus gurgite cervus

Eluctatur iter nec quiquam aperire ; per ima
Labitur , et niveâ procumbit mole sepultus.

Ipse , caput quatiens , villisque rigentibus ursus
Horridus , immanem rugitu ingente procellam
Indignans , tardis muscosum passibus antrum
Quærit , ubi latitans , et cæcâ solus in umbrâ ,
Absque cibo , quam longa furit bruma aspera , torpet.

Nos verò audaci deserta cacumina gressu ,
Extremum arctois quæ cingunt finibus orbem ,
Tentemus. Pelagi quam formidanda minacis
Illi facies , tetro irrequieta tumultu !

In chaos antiquum confundi cuncta , trucesque
Dixeris Oceano tam fœdo habitare procellas.

Heu ! miserum impavidis qui talia navibus ire
Per maria ausus erit ! Rapido nam vortice prora
Allisa ad scopulos , inimicas accipit undas ,
Immanesve inter glacies , imitantia ferrum
Æquora , funereis consistit vincita catenis.

Lumine tunc ursi torvo spatia illa marini

Lustrantes , latè horrendis mugitibus auras
 Incutunt; quibus , in densis exterritus umbris ,
 Instantem propius præsagit navita cladem :
 Dulcia si qua domi , periturus corde revolvit.

Tanta pericla tuum triplici , Dux magne , triumpho
 Ingenium vicit , placidâ qui mente novarum
 Terrarum tractus quærens hominumque novorum ,
 Et pelagum à Libyâ gelidam permensus ad arcton ,
 Oribem invisisti , majoremque ipse videndo
 Fecisti. Primus tu australem audacibus axem
 Circumiens ratibns , glacierum et longa secentus
 Mænia , et ignotis freta formidanda barathris ,
 Frigoris impavidus penetralia ferrea adisti.

Nullum illic animans ; spatium sed triste , geluque
 Concretum : rigidas volucris nulla audet in auras
 Tollere se pennâ , nisi sola assueta procellis
 Quæ tulit inde suum , volucris tristissima , nomen ,
 Per deserta ferâ stridens horrendâ querelâ.

Ast ubi pax habitat , felix ibi vita. Furentis
 Verberibus jacet assiduis obnoxia brumæ

Insula : diverso genere hic animantia visus
Nunc etiam recreant felicis imagine vitæ.

Littus, ubi apparent vix gramina rara, frequentant,
Cærulei quondam Protei gens humida, Phocæ,
Densa quibus per colla fluit juba, more leonum ;
Insulæ at in mediâ Phocarum immota morantur
Agmina, queis ursi nomen fecere ; et arenis
Mobilibus mancæ committunt ova volucres.

Quas inter nullas pavor, ars et nulla nocendi ;
Fœdere tanquam omnes inter pax icta maneret.

Reginæ aurarum sublimes cædibus ipsæ
Abstinuère ; altâ riparum in rupe sedentes
Fulmineo volucrem circù non lumine terrent
Ludentem. Sed homo sub amico atrocia sole
Bella infert homini, cererisque infesta per agros
Agmina castra tenent ; sulcat globus arva cruentus.

Non iræ pelagi immanes sat multa parabant
Funera : homo secum jāni furera plura carinis
Invehit ; et donum cœli vitale, per artem
Heu ! nostram, irato fit fulmine sævior ignis.

Alter et Icarius de summâ prælia nube
Imperat, et miseræ dat signa infanda ruinæ.

Hic atra invidiæ pallentis dextra venena
Comparat, hic tectâ vigilat fraus impia sicâ.

Ora scelus centum, centum fraus impia vultus
Induit; atque inter fraterno obeuntia ferro
Millia, fraternis et saucia millia telis,
Illorum numero, simul et cruciatibus horum
Gaudet Erynnis ovans; homines itâ tetra malorum
Quæ coluere metunt, propriis nempè artibus ægri.

Dona tamen Cereris vastati tertia mundi
Pars adeò ignorat, neque mittit ad horrea dites.
Tam multas adeò ullus ager quam posset aristas;
Nec gens ulla suos discit quam multa per agros
Et nemora et valles lateant felicia dona.

Mitior et quantò sapientior illa ferorum
Gens hominum, ingratas Asiæ quæ dicitur oras
Incolere, unde arcti tumidas ultrâ æquoris undas
Proxima prospicere est Americæ littora! Rectæ
Naturæ docilis gens illa ediscere gaudet

Quidquid plantarum profert sua terra , suamque
 Progeniem docet atque habitus et nomina vimque
 Insitam. O Europæ crudeles impia gentes
 Projicite armâ manu tandem. Aut si nulla flagrantes
 Otia ferre animi possunt , certamine pulchro
 Quærите virtutemque artesque beataque fata.

Dissidia hæc tandem jaceant civilia ; et aliae
 Comoda naturæ miracula discite , Doctis
 Quæ non vana offert succensâ Chymia flammâ ;
 Jàm vobis magicâ dextrâ ingeniosa poësis
 Myrthos Aoniâ laurosque insevit in orâ ;
 Vobis quæque parat sempèr nova gaudia musa.

Deliciæ ingenio quantæ , quùm summa tuetur
 Sidera per latos jusso labentia cœlos
 Ordine , metiturq; ignotaque , ut Herschelus , astra
 Detegit ; inque Deo , defessum luce , quiescit !

Sin , tentare viam ne possim ad limina cœli ,
 « Frigidus obliterit circùm præcordia sanguis ;
 » Flumina amem sylvasque » : imâ sub rupe , latentis
 Audiam inexpletâ modulamina Aëdonis aure,

O nemorum sonitus , sylvarum ô umbra silentum ,
Vos mihi deliciæ , mihi semper adeste canenti.

Post sævas noctes quæ brumâ horrente rigescunt ,
Udis austrorum putrescere campus ab auris ;
Consimili cunctos quæ colles vestit amictu
Nix labi sensim , longosque emittere rivos ;
Tùm tumidi horrendis glacierum molibus amnes
Rupta vehunt magno mugitu vincla ; sed omnis
Nondùm cessit hyems : sordescit squallida sylva ,
Ardua nudato lachrimatur vertice quercus .

At nonnulla tamèn , triste inter vulgus , amœnâ
Fronde virent. Blando salvete arbusta colore ;
In tanto mea vos recreatis lumina luctu.

Ut nonnulla seni rident quoque dulcia , sic vos
Mœsta tenebrosæ mulcetis tempora brumæ.

Vos mihi , vos animum nunc instaurate trementem
Tanta pericla viæ quam , multa per ardua , primus
Tentavi , arctoas glacies , pelagumque sonantem ,
Extremoque austri furibundas axe procellas .

Si quis non magno , brumæ per tempora , sumptu
Circùm ædes arbusta velit viridantia semper
Cernere ; nil Cafris , neque Sinis irroget ; ipse
Vicinâ è sylvâ , flaventi stipite buxos ,
Ilicem aculeolis inter rubicunda coralla
Hirsutam , et ruscum florenti fronde rubentem
Extrahat , et sese non fluxâ recreet umbrâ .

Stagnorum Alnus amans , Corylusque , et Betula candens
Agrestes etiàm decorabunt agmine scenas ;
Quæ , simulac hiemem Boreas frigusque reducens ,
Verticibus folia excussis nudavit ; oborti
Expediunt sese flores , et multa corolla
Mobilibus se folliculis dat pendula in auras .
Laureolæ quoque sub nivibus traxêre colorem
Daphnides , Helleboroque virescere et ipse December
Gaudet . At his florum properis ornatibus alta
Centimanûs hederæ præcellit copia ; siccum
Seù longævæ Orni latâ caput obtegat umbrâ ,
Seu veteris viridans extremo in culmine tecti ,
Ramorum et longos inflexa per aëra tortus ,
Hospitaque alituum , se densus informet in orbem ,
Vespere ubi merulæ , fugitivoque agmine turdi

Garrulitate locos hilarant, avidoque corymbos
Ore petunt, similes maturescentibus uvis.

Si libet externas patriis adjungeré plantis,
Pulcha Trapezuntis jamdudum filia nostrâ
Frigoris et nivium victrix assuevit in orâ;
Musarum quæ sæpè comas frontemque Gradivi
Nobilibus foliis, lauri priscæ æmula, cinxit.
Nostris hæc hortis regnet, circùmque vagantes
Eoæ ostendant vexilla fluentia Thujæ.
Africa ab infesto boreæ defendite flatu
Neria, quæ Libyæ juga per nemorosa virescunt,
Et rivos roseis circùm pendentibus ornant
Fasciolis, immugit ubi lugubris Hyæna,
Ebriaque immanis dormitat tigridis ira.

Campus ità ornatur; sed fronte severior altâ
Gaudebit collis piceis et pinibus: imo
Squammeus his conus pendebit acumine, at illis
Squammeus erecto consurget acumine conus.

Denique proceras utrisque adjungite cembras
Ex quibus æquoream classis fabricatur ad undam;

Et quarum inter se collectæ , more modoque
Peniculi , frondes radios imitantur acutos.

Limoso juvat è campo concendere in alta
Collis , ubi truncos flatu stridente sonantes
Sæva sed immotos aquilonis verberat ira.
Illic , sublimis vasto sub tegmine sylvæ ,
Improvisi avium garritus veris amicam
Effingunt animis speciem , et felicia reddunt
Gaudia ; nàm rostro jam strenua Loxia curvo
Subtexit nisi summis opera ardua ramis.
Jamque novis soboles plumis induta , paternâ
Exercebit ovans hilares sub fornice ludos ,
Quùm volucres aliæ , juncto vix foedere amornm,
Nondùm perfecto deponent ova cubili.

Tuque , ô nate hyemis , tu confuso agmine musce
Densior , hùc propera te musæ offerre vocanti.
Pronâ continuas quùm tristis aquarius urnâ
Effundit pluvias , et opacant æthera brumæ ,
Quùm sternit flores alios inamabile frigus ,
Tùm virtute novâ tu , mûsce , renasceris ; atque
Lugentem viridi solaris tegmine terram.

AEmilii tua tūm penetrare arcana parabat
Mentor, ubi, studii neglecta per otia dulcis,
Ducturum tandem secum se tempora vitæ
Ultima sperabat. Cui se modò fontium amica
Multūm attendenti nempè explicuisset, et ipse
Nos olim forsitan docuisset qualibus ignem
Viribus instantem frons tantula sistere possit;
Innumeris modò vidisset lycopodia ramis
Reticula in magnâ tendentia plurima sylvâ,
Vertice clavato miram jaculantia arenam
Quæ luce ipsa sonoque imitatur fulmina. In omni
Exigua ista loco sparsa et fallentia visus
Vir tanti ingénii læto aspexit amore,
Haud secùs admirans ac si canadensis celsæ
Tunc invenisset primùm fastigia pinūs,
Aut, viridi ingentem Libanum quæ vertice latè,
Sæcula jàm mille, opperunt, capita alta cedrorum;
Haud quippe ignarus naturam sæpè labores
Exiguo spatio ingentes occludere. Iniqua
Consilium innocuum vis lethi abrupit. Amœnos
Sic inter colles, ubi, mulcens ipse dolorem,
Laudibus abdebat sese, invidiæque furenti,
Extruat hinc pietas monumentum grata modestum:

Simplicitas dilecta viro , dux una piarum
 Sit manuum; huic tales fas uni accedere manes.
 Hinc procùl infelix nimiùmque molesta cupresse.
 Hùc sola adsunto formâ virgulta venustâ ,
 Quæ dormitanti diyûm famulentur amico.
 Jàm teneris dilecta animis Lonicera , lentis
 Viminibus tumulo impositam complectitur urnam ;
 Ingeniique comes , viridanti stipite laurus ,
 Nobilibus tumulum consurgens frondibus ornat.
 Ipse nemus quoque populeum frondente coronâ
 Extendam. Vos ò sonitu quarum ille canoro
 Gaudebat , properate , sedete sub umbras ,
 Innocuæ , timidum genus atque imbelle , volucres ;
 Nùnc etiàm circùm resonent concentibus anræ ;
 Et procul à vulgo canite et volitate profano :
 Manibns isti etiàm cantus ludique placebunt.

Si vota exsuperans , Fortuna benignior unquàm
 Majora arva mihi , sylvasque et prata dedisset
 Pingua ; tunc nostris exsurrexisset in hortis
 Dilecti cujusque viri sublimis imago ,
 Naturam cui carminibus celebrare canoris
 Musa dedit. Meritos palmæ immortalis honores
 Ascrœusque senex atque ipsius æmulus ille

Rossetus noster, læta ipsâ dante Cybele,
 Acciperent. Purâ cum majestate venustus,
 Alter Apollo, daret nostris Maro jura poëtis.
 Lillius, Acaciæ tenui sub fronde, teneret
 Pastorale pedum, mediâ concinnus ut urbe:
 Nunc etiàm siculus pastor, pastorque sicamber
 Agrestes choreas calamo resonante cierent.
 Te, bone, quâque die, Fontanî, lætus adirem.
 Tuque, ô qui grandi cecinisti carmine menses,
 Rucceri, fatis heu! qui melioribus uti
 Debueras, te protegeret moesta umbra cupressi.
 Massonemque et Marnesiam mea tota putares
 Dimetiri ultrò doctâ viridaria dextrâ.
 Gauderet felici olerum Vannerius horto,
 Nec flores nostros contemneret ipse Rapinus.
 Fatidicâs inter sylvas, torrentis ad undam
 Præcipitis, caneret sublimia carmina Thomso;
 Vinciret roseis varia anni tempora nodis
 Bernius; et sophiam Lambertus carmine adornans
 Nobilitata ipsis offerret aratra Dynastis.

Felix qui potuit sibi tanta parare per hortos
 Ornamenta! magis sed forsitan ille beatus
 Qui sine fastu habitans placidissima rura, librisque

Contentus variis , sapientum ubi vivit imago ,
Illiorum ingenium mente exultante tuetur !
Nil cupit ille ultrà vallem , ridentia primis
Lætus ubi radiis collustrat limina Phœbus ,
Et quem vicino delapsus rivulus hortum
Colle rigat , sylvæque propinquæ frigus opacum .
Urbium in insano luxu quid quærat ? Amœni
Munditas veris vidi , lata horrea messes
Implevère , fluensque pedes vindemia tinxit .
Pulchra diem nitidâ si luce aurora serenam
Nunciat , uxorem secum sylvæ per opaca
Ducit , et exiliens natus comitatur euntes .
Poma , aliquotque cibi misit quos villa , nitentis
Apposita in rivi florenti margine , inemptas
Delicias præbent et dulcis gaudia cænæ ,
Quam non solliciti turbat malè conscientia cordis
Cura ; sed innocuos circum læta omnia rident ,
Unanimesque simul felici sorte fruuntur .
Aurea sic ætas , mundo nascente , fluebat .

Venit Hyems . Illi non cessat blanda voluptas :
Hortorum teneros boreæ subducere alumnos ,
Exornare domum , viridi et circumdare saltu ,
Interiorum etiā partem subit ipse laborum ,

Uxori officio blandi auxiliatus amoris ;
Concordes quid enim jucundius inter amantes !

Illum quam miseret brevium dominantis honorum,
Lætitiam vultu, mœrorem corde gerentis !

Naufragia instabiles miserorum crebra per undas
Spectanti, ipse sibi benè littus amare videtur.

Sub tecto placidus, seras quum protulit horas
Vesperus, AEgei docto duce littora Ponti
Perlustrat; Sophiæ Samon incunabula priscæ,
Inclyta dictæi Minois regna, et opacæ
Ingentes sylvas Idæ, et nigra culmina Cynthi.
His amat ille oris plantas reperire salubres
Antiquo magnus quas carmine laudat Homerus;
Quas ipsi in sylvis aliquandò avellere eisdem
Dignati, heroum sananda ad vulnera, divi.

Nec sophiæ tumidus fastu, sed blandus amicis,
Dulcia vicinos modò per convivia secum
Consociat lectos, modò ab illis ipse vocatus
Illorum gaudet lætanti accumberè mensæ.
Si qua novo ipsius viridaria ditat honore
Arbor; ubi optatum traxerunt poma colorem,

Horum primitias studiosis mittit amicis :

Illis si qua placet plantarum , haud postera surgit
Aurora , optatà quin gaudeat hortus alumnâ.

Invidiæ urbanæ rumores talia nunquam
Limina perrumpunt. Hic ruris dulcia laudat
Gaudia , diversis diversa in mensibus anni ;
Ille refert quanto Lodoïcus amore suorum ,
Damna resarcierit quorum ipse innoxius unus ,
Quamque benignus iis patriam dignetur et ipsis
Reddere , queis Scythicas abductis nuper in oras
Ferrum hostile , geluque immane , famesque pepercit.
His dictis , roseum commota puella ruborem
Ore Chloë timido perfunditur ; ipsa enim amantem
Tanto divini redditum munere Regis
Sperat ; et anticipi percillitur anxia mente.
Allevat auxilians alio sermone perita
Mater , et illa intus tacito solamine gaudet
Virgo , nec ulla sui vestigia prodit amoris.

Horæ quam dulces ! quam dulcia fata molestis
Vos fugiunt curis quos irrequieta fatigat
Ambitio , tristi quos nocte dieque perurit
Invidia igne furens ; socios qui semper acerbo
Dente obtrectantes , dente obtrectamini et ipsi ;

Queis si fors vultu fortuna vocata sereno
 Arridet , subitô aversâ fugit improba pennâ.
 Lætitiam votis arcessitis : ecce metentem
 Aspicite irriguæ secundo vallis in agro ;
 Aspicite errantem viridantum in gramine molli
 Pratorum; aut salicis, lacuum propè littus , opacæ
 Dulce quiescentem blanda inter somnia in umbrâ.

Partibus infandis procùl , armorumque tumultu ,
 Gaudia ruris ego sic hortorumque canebam.
 Sæpe malis Patriæ compresso obmutuit ore
 Musa , et mœsta manu cecidit lyra. Deinde solutæ
 Instar avis , nova quæ , si sæva procella furorem
 Deposuit , notâ instaurat modulamina voce ,
 Attentam solito recreabam carmine ripam.

Tu , dulcis conjux , tenero quam semper amore
 Amplexus , facto cecini sub nomine Elisæ ,
 Tu mecum seris etiàm memorabere seclis.

EXPLICIT BOTANICÔN LIBER QUARTUS ET ULTIMUS.

INDEX,

FERÈ LINNÆANUS;

*Nominum vocumque minus vulgarium quæ in his
Botanicōn libris occurrunt.*

ACER pseudoplatanus, *l'érable.*

Aëdon; Motacilla luscinia, *le rossignol.*

Æschinomene grandiflora, *l'agathis.*

Æthusa cynapium, *la petite ciguë.*

Agaricus campestris, *l'agaric comestible.*

Albellus; Agaricus albellus autumnalis, *le mousseron.*

Alnus; Betula alnus, *l'aune.*

Amadava; Fringilla amadava, *le bengali.*

Amaryllis formosissima, *l'amarylle, autrement lys
Saint-Jacques, et croix de Calatrava.*

Ambar, *l'ambre gris.*

Amboïna, *l'île d'Amboine, l'une des Moluques.*

Ananas; Bromelia ananas, *l'ananas.*

Anthophyllum Molucarum; Caryophyllus aromati-
cus, *le giroflier.*

Apium graveolens vel dulce, *le céleri.*

- Apium petroselinum*, *le persil*.
Arbor Armeniæ; *Prunus armeniaca*, *l'abricotier*.
Arbor Cerasuntis. V. Cerasus, *le cerisier*.
Armeria statice, *le gazon d'olympe*.
Ascræus senex, *Hésiode*, né à *Ascra en Béotie*.
Aster grandiflorus, etc., *l'Aster*.
Aurantiacus; *Agaricus aurantiacus*, *l'oronge*.
Bandæa nux; *Myristica officinalis*, *la muscade*,
qui se recueille à *Banda et autres îles adjacentes*.
Bernius, *le cardinal de Bernis*, poète français.
Beta vulgaris, *Beta rubra*, *la bette*, *la bette-rave*.
Betula alba, *betula nana*, *le bouleau*.
Boletus edulis, *le ceps*.
Brassica, *le chou*. *Insubria*, *le Milanez*, *la Lombardie*.
Bromelia ananas, *l'ananas*.
Burdigalus Præses; *Montesquieu*, *l'auteur de l'Esprit des Lois*.
Cactus, *le nopal*, plante dont les feuilles nourrissent
l'insecte nommé cochenille, *coccinella*. Ce dernier mot est évidemment le diminutif de *coccus*,
qui a pour synonymes *murex*, *conchylium*, *ostrum*
et *ostreum*.
Camæpithis; *Teucrium camæpithis*, *l'ivette*.
Carolus (magnus) *Charlemagne*, fils de Pépin le bref.

- Carthesius, *Descartes*, le précurseur de Newton.
Cembra, *V.* Pinus.
Centaurium ; Gentiana centaurium, la centaurée.
Cerambix moschatus, le capricorne musqué.
Cerifera. *V.* Myrica.
Chamærops excelsa, le latanier.
Cervus alce, l'élan ; l'orignal, au Canada.
Cervus tarandus, le renne.
Cicuta virosa, la ciguë.
Cistus helianthemum, le ciste.
Cocos nucifera, le coco.
Convolvulus, le convolvulus ou liseron.
Cortex (Cinchonæ officinalis) le quinquina.
Cucumis melo, le melon.
Daphne laureola, le daphné.
Daucus carotta, la carotte.
Dianthus carophyllus, l'œillet.
Dictamnus ; Origanum dictamnus, le dictame.
Dionæa muscipula, la dionée.
Ebulus ; Sambucus ebulus, l'hièble.
Elastrum (emprunté du grec) ressort.
Erica, la bruyère.
Erigeron ; Senecio, le seneçon.
Euphorbia sylvatica, l'euphorbe.

- Fagus sylvatica**, *le hêtre.*
- Faseolus.** *V.* **Phaseolus vulgaris**, *le haricot.*
- Filix** (*Pteris aquilina*) *la fougère.*
- Fontanius**, *La Fontaine, le Fabuliste français.*
- Fontinalis** (*Fontium amica*) *la fontinale.*
- Fragum**; *Fragaria vesca, la fraise.*
- Fraxinus excelsior**, *le frêne.*
- Fraxinus ornus**, *l'arbre à manne.*
- Fringilla cælebs**, *domestica, le pinson, le moineau.*
- Gelsimina.** *V.* **Jasminum.**
- Hedera helix**, *le lierre.*
- Helleborus niger**, *l'hellébore, ou herbe de Noël.*
- Herbacea**; *Salix herbacea, Lapponum, le saule.*
- Hyperborea volucris**; (*Anas mollissima*) *l'eider, dont le duvet se nomme édredon.*
- Hypnum serpens**, etc., *l'hypne.*
- Hypocaustum**, *poèle, fourneau.*
- Ilex aquifolium**, *le houx.*
- Jasminum fruticans**; *Jasminum officinale, le jasmin.*
- Jonquilla**; *Narcissus jonquilla, la jonquille.*
- Juniperus communis**, *le genièvre.*
- Juniperus lycina**, *l'arbre à l'encens.*
- Lappa**; *Arctium lappa, la bardane.*
- Laurus nobilis**, *le laurier.*

Lilium candidum, *le lis.*

Lillius, *Delille*, le traducteur des *Géorgiques de Virgile*, en vers français. Tel est son plus beau titre de gloire littéraire. On a fait à ses autres ouvrages l'application de ce mot de Quintilien : *Amabilibus abundat... Quant à son noble caractère, on n'oubliera jamais que Delille osa braver Robespierre et le Directoire, et qu'il refusa de louer leur successeur.*

Linnæus, Carolus Linnæus, le *Newton de la botanique, de la zoologie, etc.*

Macaotes. *V. Psittacus.*

Malleus ; Carolus cognomine Malleus ; *Charles Martel.*

Manca volucris (*Aptenodyte patagonica*) *le pingouin.*

Maro ; Publius Virgilius Maro.

Meldæus sacerdos, *l'évêque de Meaux, Bossuet.*

Mentha aquatica, *la menthe.*

Mercurialis annua, *la mercurielle.*

Modunum, *Meudon, entre Paris et Versailles.*

Morrencia vallis, *la vallée de Montmorenci.*

Mus sylvaticus, *le mulot.*

Musa paradisiaca, *le bananier.*

Muscus, *la mousse.* Pour cet article, encore plus que pour beaucoup d'autres, je dois renvoyer le lecteur aux notes qui sont à la suite du poème français.

- Myrica cerifera*, *le cirier.*
Nardus indica, *le nard.*
Nasturtium; *Cardamum*; *Cardamine pratensis*, *le cresson.*
Nerium oleander, *le laurier-rose.*
Nyctantes sambac, *le jasmin.*
Nymphaea alba, *le nymphæa ou nénufar blanc.*
Obius, *l'Obi*, *fleuve de l'Asie septentrionale, qui donne son nom à l'Obskaïa ou golfe de l'Obi, dans l'Océan glacial.*
Ocellus. *V.* *Dianthus.*
Ophrys insectifera, *l'ofris.*
Ornus; *Fraxinus ornus*, *l'arbre à manne.*
Panax quinquefolium, *le ginseng.*
Paranæ herba (*Cassine Paragua*) *l'herbe de Parana ou du Paraguay.*
Parus major, etc., *la mésange.*
Phoca jubata, *le lion marin.*
Phoca ursina, *l'ours marin.*
Picea; *Pinus picea*, *le sapin.*
Pinus abies, *le picea.*
Pinus sylvestris, *pinea*, *tæda*, *cembra*, *strobus*, *les pins.*
Primula veris, *la primevère.*
Procellaria antarctica, *le pétrel.*

- Psittacus macao*, *psittacus versicolor*, *psittacus lory*, etc., *l'ara*, *la perruche*, *le lory*, etc.
- Rapinus*, *le P. Rapin*, *auteur du poëme latin DES JARDINS.*
- Rheum undulatum*, *la rhubarbe.*
- Rossetus*, *Rosset*, *qui le premier donna des Géorgiques en vers français.*
- Rubus fruticosus*, *cæsius*, *la ronce.*
- Ruccerius*, *Rouchèr*, *qui, par les qualités de son ame, encore plus que parses talens, mérita l'honneur d'être envoyé à l'échafaud par le tribunal révolutionnaire.*
- Rumex acetosus*, *l'oseille.*
- Ruscus aculeatus*, *le fragon.*
- Ruta graveolens*, *la rue.*
- Salicaria*; *lytrum salicaria*, *la salicaire.*
- Salictum*; *Salix alba*, *purpurea*, *viminalis*, etc., *le saule.*
- Salix vitellina*, *l'osier.*
- Salvia sclarea*, *la sauge.*
- Sanicula Europæa*, *la sanicle.*
- Scabiosa succisa*, *la scabieuse.*
- Scandix cerefolium*, *le cerfeuil.*
- Sciurus*, *l'écureuil.*
- Seïba*; *Bombax ceiba*, *le séiba.*

